




蓮宗寶鑑  
坤

ハ 5  
777  
2





廬山蓮宗寶鑑念佛正行卷第六一十四章

念佛正行說

夫常光界本無色象有應則形菩提道既闢要途非  
行不至維摩經云五百長者子寶積白佛言我已發  
阿耨多羅三藐三菩提心願聞得佛國土清淨願說  
菩薩淨土之行佛言寶積衆生是菩薩淨土肇法師  
云至人空洞無象應物故形形無常躰况國土之有  
常乎蓋群生萬端行業不同殊化異被致令報應不  
一是以淨者應之以寶玉穢者應之以砂礫美惡自  
彼於我無定無定之土乃曰真土然則土之淨穢係

乎衆生故曰衆生之類是菩薩淨土也夫如來淨土者以無方為躰故雜行衆生同視異見異見故淨穢所以生焉無方故真土所以形焉若夫取其淨穢者衆生之報也本其無方者佛土之真也豈曰殊域異處凡姓二土然後辨其淨穢哉道生法師曰淨土行者行致淨土非造之也若欲造於土者衆生類矣容以濫造不得不先明造本以表致義然後說行羅什法師曰寶積問淨土之相世尊答言衆生是菩薩淨土者蓋說果上之因也清涼國師云諸佛心內衆生新新作佛衆生心中淨土念念證真經云菩薩隨所化衆

生取於淨國土為饒益諸衆生故譬如有人欲於空地造立宮室隨意無礙若於虛空終不能成菩薩如是為成就衆生故願取佛國非於空也當知直心淡心大乘心是菩薩淨土肇法師曰土之淨者必由衆生衆生之淨必因衆行行淨則衆生淨衆生淨則佛土淨此必然之理不可差也土無灣曲乃出於直心故曰直心是菩薩淨土直心謂質直無諂此心乃萬行之本生法師曰樹心種德深固難拔深心也乘八萬行兼載天下不遺一人大乘心也此之三心始學之行也欲弘大道要先直心心既真直然後入行能

深入行既深則廣運無涯此三心為之次序也備此  
三心次脩六度以至萬行什法師曰直心者誠實心  
也發心之始在於誠實道識彌明名為深心正趣佛  
慧名大乘心經云布施持戒忍辱精進禪定智慧是  
菩薩淨土四無量心四攝法是菩薩淨土方便是菩薩  
淨土三十七品是菩薩淨土迴向是菩薩淨土十善  
是菩薩淨土如是寶積菩薩隨其直心則能發行隨  
其發行則得深心隨其深心則意調伏隨意調伏則  
如說行隨如說行則能回向隨其回向則有方便隨  
其方便則成就衆生隨成就衆生則佛土淨隨佛土

淨則說法淨隨說法淨則智慧淨隨智慧淨則其心淨隨  
其心淨則一切功德淨什法師曰直心以誠心而信佛法  
也信心既立則能發行衆善衆善既積其心轉深深  
心堅固則不隨衆惡棄惡從善名調伏心心既調伏  
則遇善斯行遇善斯行則難行能行難行能行則萬  
善無具萬善兼具故能回向佛道向而彌進方便力也  
方便之要有三一善於自行而不取相二不取證三善  
化衆生具此三者則得淨土土既清淨則衆生純淨衆  
生純淨則與化主同德故曰皆淨也諸經雖廣說淨國  
之行未明行之階漸今此註明至極深廣不可頓超

宗卷六  
三  
宜尋之有途履之有序故說踐行之迹始于直心直  
心即是真心此心者羣生誰不有之蓋自迷而不知  
不覺也故六祖大師云一念平直即是彌陀一念邪  
險即是衆生蓋以人居濁世現行無明口說直心行  
多諂曲溺於苦海而不能出是故佛慈愍彼示之而  
方便導之以念佛伏彼亂心令捨邪險而歸乎正真  
即衆生而生淨土所以寶王論云清珠下於濁水濁水  
不得不清佛想投於亂心亂心不得不佛是以因念  
佛而顯直心因直心而行衆善行衆善而得佛淨土  
豈非佛祖之方便智力乎肇法師云積德者故淨心

心淨則無德不淨生法師曰功行即淨土之殊勝因  
也功德即淨土之殊妙果也淨土因果蓋是心之影  
響故云欲得淨土必淨其心所謂聲和響順形直影  
端者矣

### 脩進工夫

淨土唯心之說既已明矣人皆知有必須親到而後  
已欲證此道當以正信為入門以脩心為正行正行  
者即所施之功所行之行也此之功行名為淨業即  
往生西方之資糧也此之行業隨人所脩蓋一切人  
力量有大小機智有淺深所以行業不等上上根智

人直下自悟識自本心見自本性即是彌陀此則是  
如來無住無依最上乘境界萬中無一也其未能頓  
悟之人須是諦信淨土一心念佛漸次進脩仗阿彌  
陀佛願力攝持自己一念真實下工正如抱橋柱澡  
洗萬無失一也雖云念佛一門其實意含無盡是故  
祖師立教利鈍俱收有實有權有深有淺有頓有漸  
皆可脩持上根者叅究坐禪中根者觀想持念六時  
脩禮日夜精專下至十念成功總在一心履踐各有行  
相次第階梯隨力行持皆可進趣此之行門乃成就  
佛果菩提之道路也須是自信自行自脩自度要在

立大志發大願自辦工夫努力向前莫作容易譬如  
百二十斤擔子到臨時及節自家擔荷得去方為了  
事決定不在會說會道廣化人緣上決定不在有傳  
有授扭捏做作上決定不在廣設道場多點香蠟上  
蓋由著事相而迷昧正理順聲色而違背真宗數他  
寶而自無半錢貨良藥而自疾不救是故遠祖師云  
得其趣者若暗室之燃燈失其意者同滯指之迷月  
殊不悟無心乃正動念皆邪慧日旋隱乎昏雲客塵  
轉翳乎心鏡遂乃念慮交馳情欲紛競調伏不息止  
制猶繁落無記者徒滯於兀然希有得者便同諸邪

命指置無從難言正定無期入於法界永久處於塵  
籠凡修淨土之人灼然是要敵他生死不是說了便  
休當念無常迅速時不待人須是把做一件事始得  
若也半進半退似信似疑到了濟得甚麼邊事如何  
出離輪迴若是信得及便從今日去發大勇猛發大  
精進莫問會與不會見性不見性但只執持一句南  
無阿彌陀佛如靠著一座須彌山相似搖撼不動專  
其心一其意或參念觀念憶念十念或默念專念繫  
念禮念念茲在茲常憶常念朝也念暮也念行也念  
坐也念心念不空過念佛不離心日日時時不要放

捨綿綿密密如雞抱卵常教暖氣相接即是淨念相  
緬更加智照則知淨土即是自心此乃上智人修進  
工夫如此把得定做得主靠得穩縱遇苦樂逆順境界  
現前只是念阿彌陀佛無一念變異心無一念退惰  
心無一念雜想心直至盡生永無別念決定要生西  
方極樂世界果能如是用功則歷劫無明生死業障  
自然消殞塵勞習漏自然淨盡無餘親見彌陀不離  
本念功成行滿願力相資臨命終時定生上品其或  
力量未充應須隨力修習未能專一辦功亦要朝昏  
禮念縱使家緣繁冗無忘十念稱名日日用心猛著

精彩積功積行發願發心誓畢此生同登淨域可謂  
水須朝海去雲定入山歸

資生助道

在家菩薩念佛高流日赴檀信之齋坐享人天之供  
皆非常道不若治生有意修行豈妨作務或田疇播  
種或市井經營或富有家資或日求升合應思勤則  
不惰儉則有餘以此脩身方為佛子若也奢華懶惰  
生事蕭條雖欲修行不可得也信知治世資生皆順  
正法工巧伎藝饒益群生欲修淨業正因當以資生  
助道所以潭州黃老常打鐵以修行居士龐公賣炭

籬而養道俞彌陀畫像為業戴佛庵發燭資身可謂  
一日不作一日不食矣

作福助緣

有淨業弟子問蓮宗慈照導師云弟子專修念佛三  
昧可得用布施持戒供養作福不師答曰汝能專念  
彌陀若不持戒則有毀犯罪若不布施則長慳貪業  
若不供養三寶則有我慢業若不恭敬一切則有輕  
人罪是故毀犯即墮地獄慳貪即墮餓鬼我慢則常  
在惡道輕人則世世貧賤似此惡業障蔽欲生淨土  
其可得乎如此念佛之人譬如旱田栽穀欲望收成



不可得也故肇法師云有為雖偽棄之則佛道難成  
無為雖真執之則慧性不朗汝今欲修念佛三昧得  
生淨土速成佛果菩提者須是專以念佛為正行更  
以福德為兼修晨夕常勤供養三寶禮拜懺悔布施  
持戒繫白三業增助淨緣諸惡莫作眾善奉行所修  
一切善根悉皆回向淨土成就念佛功德速證菩提  
可謂順水行船更加艣棹矣

去惡取善

淨土十門教誡云修淨土人須是去惡取善方得成  
就功德若人雖念彌陀嫉妬心盛名聞尖刀臨終風

刀解身百骸疼痛或言我能持戒他不能行傲慢師  
僧輕毀一切現生折福短壽勞病吐血而亡也若念  
佛之人塵垢未淨惡念起時須自檢照或有慳貪心  
嗔恨心痴愛心蛆妬心欺狂心吾我心貢高心諂曲  
心邪見心輕慢心能所心及諸逆順境界隨染所生  
一切不善之心設或起時急須高聲念佛斂念歸正  
勿令惡心相續直下打併淨盡永不復生所有深信  
心志誠心發願回向心慈悲心謙下心平等心方便  
心忍辱心持戒心喜捨心禪定心精進心菩提心及  
一切善心常當守護更要離非梵行斷惡律儀雞狗

猪羊慎母畜養畋獵漁捕皆不應為當知極樂國內  
諸上善人良由捨棄惡緣循行善業獲生淨土不退  
菩提念佛之人當隨佛學應以去惡取善為鑑誠焉  
但能依此脩持是為淨土正行可謂無限野雲風掃  
盡一輪明月照天心

拔濟幽趣

釋子沙門在家菩薩既修西方淨業當運廣大慈悲  
如法進修善隨佛教明因識果鑒是別非集出世間  
福智資糧圓大丈夫等妙功德是故釋尊再四教誡  
我諸弟子隨所住處當施法食濟諸法界一切有情

信女眼光華表氏伏為父母

除彼飢渴極苦化令同趣菩提若不施食無慈悲心  
非吾弟子是惡徒眾經有明文詳觀一切眾生不了  
自性慳貪嫉妬瞋恨愚癡於人天鬼畜之中地獄脩  
羅之內飢渴焦燥愁憂苦惱冥冥長夜求出無期以  
理推之無非宿生父母如佛所說皆是累劫惡親是  
以運觀音之慈悲脩普賢之行願誓同拔濟悉脫沉  
淪有力者修齋設供無力者呪食施生施食殊功廣  
大無量具足妙理言莫能窮略舉數端普告賢者施  
心一發妙行全彰具足三檀圓修六度利他自利自  
覺覺他善集出世福智永作淨土資糧廣植鎡基圓

成躰用乃至埋藏枯骨掩瘞暴屍普為幽魂代伸懺  
悔橋梁義井通濟往來飲食錢財隨力惠施每見貧  
窮凍餒痛切悲憐至於孤老癯殘倍加慈念常存利  
濟曲盡真慈凡修一切善根盡願衆生成佛以慈勝  
利回向西方普冀有情同登覺岸是以蕭梁武帝修  
水陸之儀三歲不空有濟孤之法可謂一雨周沙界  
群心永夜蘇

### 放諸生命

欲趣菩提慈心為本凡修淨業濟物為先觀夫飛禽  
走獸水族遊鱗或掛網羅或拘籠檻穿腮反翼繫足

信矣印華人氏伏為父母

倒懸將臨湯火之間欲赴刀砧之上憂悲恐懼變懼  
憧惶望雲漢以魂消憶林泉而膽碎雖知萬死猶冀  
一生顧盼哀鳴以求救拔所以弟子悲憐抽財續命  
開籠釋檻斷縛解懸施水焚香合掌呪願法施事畢  
安詳放之或縱陂池或賚林野皆由佛道展演悲心  
乃至上及人倫下溘螻蟻但能救死無不放生既乃  
放生自然長命因茲勝利回向西方普願衆生同成  
佛道所以長者活魚沙彌救蟻鄭昌圖焚燒罟網顛  
禪師建立生池楊寶之療病雀敏仲之投蝦蜆元祖  
師有頌戒殺滿禪師說戒放生可謂慇懃為解丁香

結放出枝頭自在春

六度萬行齊修

六度者布施持戒忍辱精進禪定智慧六波羅蜜也若念佛人專修三昧學出世間須達乎至善要知六度萬行不出一心於一心中一切法俱備如浴大海已用諸河水也如萬種香為丸若燒一九具足眾味如人取寶獲如意珠王一切眾寶出生無盡也何以知其然執持一句阿彌陀佛故得三昧一念之中與理相應諸法現前六度萬行皆悉具足布施則心無染著持戒則不起妄緣忍辱則能所俱忘精進則心

信女回慈華韓氏伏為父母

無間斷禪定則動靜俱寂智慧則不立絲毫乃一度之中出無量度度度之內如帝網羅但知一心本空自然萬行俱足是故八萬四千法門八萬四千智慧八萬四千功德皆從一念念佛心中出生也華嚴經賢首菩薩言佛子於一切時中善用其心則獲一切勝妙功德可謂一性圓通一切性一法徧含一切法

維摩大士示淨土八法

維摩詰經云眾香世界菩薩問曰菩薩成就幾法於此世界行無瘡疣生于淨土維摩詰言菩薩成就八法於此世界行無瘡疣生于淨土何等為八饒益眾

生而不望報代一切衆生受諸苦惱所作功德盡以  
施之等心衆生謙下無闕於諸菩薩視之如佛所未  
聞經聞之不疑不與聲聞而相違背不嫉彼供不高  
己利而於其中調伏其心常省己過不訟彼短恒以  
一心求諸功德是為八法行無瘡疣生於淨土

較明脩行難易

娑婆濁境衆苦集而求道難成淨土樂邦諸善聚而  
位登不退稱名號者諸佛護念而往生發菩提者彌  
陀光照而增進菩薩羅漢與其同儔水鳥樹林悉皆  
念佛耳畔常聞妙法心中頓絕貪嗔快樂無窮壽量

信女極樂月伏為亡家夫極樂日

何極一生彼土便獲阿惟豈比人天道中觸目多諸  
違順權乘路上善根希有周圓地前三賢尚未見道  
而失念舍利六住猶遇惡緣而退心所以法華會上  
退席者五千寶積經中失道者猶衆觀佛世尚爾何  
今時不然華嚴合論問曰如涅槃經云聞常住二字  
尚七劫不墮地獄華嚴經云設聞如來名及與所設  
法不生信解亦能成種何故第六住心及地前菩薩  
猶言有退答曰從凡入道勝解未成未得謂得便生  
憍慢不近勝友不敬賢良為怠慢故久處人天隨違  
順緣惡念一起即成地獄若一信不慢常求勝友即

無此失何以故權教中第六住心地前三賢總未見  
道所脩行業皆是有為凡有無明皆是折伏有力即  
不退失至八地中始入無功用行是知三乘之士歷  
僧祇劫而功行無成念佛之門於彈指頃而位階不  
退是以生淨土者唯善無惡故位無有退者決定成  
佛故彌陀經云極樂國土衆生生者皆是阿鞞跋致  
是也嗟乎初心信淺非他力難以進脩我佛願深但  
有緣悉皆攝受須信餘門學道如蟻子上於高山淨  
土往生似風帆行於順水彌陀接引直趣菩提衆聖  
提携高超三界上品即登佛果下生猶勝天宮普信

信女妙性華秦氏伏為父母

勿疑同脩不退

天台示淨土忻厭二行門

十疑論云欲生淨土須具厭忻二行一者厭離行常  
觀此身膿血屎尿惡露臭穢不淨初觀世人從情欲  
貪愛生是種子不淨二觀父母赤白和合是受生不  
淨三住母胎藏即是住處不淨四在母胎時唯食母  
血即是食噉不淨五十月滿足從產門出即是初生  
不淨六內身膿血即是舉躰不淨七死後脰脹爛壞  
卽是究竟不淨觀身既爾觀人亦然次觀娑婆穢境  
衆苦共集生老病死怨憎會苦愛別離苦憂悲煩惱

三塗八難六趣輪迴地水火風無常敗壞貪嗔痴慢  
遇境生心應當厭離纔生厭離淨土必成二者忻樂  
行求生淨土為欲救拔一切衆生苦故是故希心起  
想樂緣西方淨國百寶莊嚴金地瓊林花池光彩神  
通自在任意他方永絕死生更無煩惱阿彌陀佛相  
好光明法門自悟衣食自然諸快樂門故須忻樂

### 淨業道場

夫淨業者無相無為之妙行不染不滯之玄宗道場  
者三世諸佛之住持菩提正覺之闡域豈名相數量  
之可測非智識能所之述乎得其旨也以誠敬為莊

嚴以行願為軌則所以維摩詰經中示道場之衆相  
遠祖師法社有節度之叙文是以解斯義者入於實  
相境與智合事與理井然五分之法身香炳千光之  
智慧燭絕思絕慮謂之清淨齋修曰敬曰嚴謂之平  
等供養行住坐卧不離道場舉動施為無非佛事念  
念彌陀出世心心菩薩放光行行盡是西方步步皆  
登寶所無一法而非正法舉一音而皆圓音讚一念  
則天龍護持行一令則魔王喪膽此則靈山一會儼  
然未散是名真法供養如來論功德則無量無邊論  
果報則難思難議以此祈福則何福不臻以此度生

則有生皆度是名真實功德是名淨業道場今嗟末  
代有等痴人不究自心不知佛理執着外境為實一  
向着相修行這邊做幾會道場那裏點幾斤香燭某  
處化多少人懺戒幾時點若干箇化緣我是張導師  
傳宗他是李師長徒弟彼是普字號伊是覺字宗不  
息根本自何來各競枝條無是處更又胡言漢語動  
輒是此非他妄解佛經密傳偽教打口鼓子弄葛藤  
頭爭我爭人論高論下漏逗不少出醜甚多不知羞  
恥故如斯豈識慙惶胡德麼將淨土一實之道變雜  
劇場把彌陀萬德之名做山歌唱失却祖師正眼鈍

置蓮宗教門達人暗地悲傷識者觀時驚愕更有敲  
鉢打鉢念真言撓僧門之應副呪水書符談禍福狀  
師巫之所為差遣諸天追亡攝祟喝罵三寶救病驅  
邪百樣蹊蹺萬般蛇異脚波波與他人作奴僕忙急  
急不顧命趁門徒讀誦時十錯九訛禮念時七囉八  
喧展開經打瞌睡收起經說家私聚頭磕腦弄精魂  
作隊成群乾打閑不息因果不顧罪懋借佛祖廣大  
法門受人天禮拜供養美則固美善則未善若是持  
佛戒在佛門當學如來之道誦佛經行佛行方盡祖  
師之心未能入聖超凡惟恐無德應供如抹卓布不



無穢汚於自身似磨刀石未免消磨於本體若能覺悟只好回頭當初投佛持齋畢竟為甚麼事既不能救於生死爭如自退省修持專念彌陀勤求懺悔近智人叅尋佛理向靜處體究心王頓令業海息波濤顯出驪珠照天地圓成自己利益他人若遇應供道場慎勿放逸輕慢依節度以無違遵齋經而奉法現前即得念佛三昧祇此是箇安樂法門上可以報答四恩下可以拔濟三有實不枉為佛子亦免辜負已靈信願相資行解均備如斯行履即現在之彌陀自此修持真人天之眼目是大緣也豈小補哉會麼青

山高處見天濶白藕開時聞水香

自行化他

佛言自未得度先欲度人者菩薩發心自覺已圓復覺他者如來應世故我蓮宗祖師勸立念佛一門行解相應自利利人化物有方誨人存理稱曰導師專以念佛三昧示導於人普令超出世間也是故教傳天下人皆仰焉今之為師者不達其道局于名相多集徒衆不修實行空有人師之名無法可師於人欲人恭敬尊重無德受人恭敬誠可耻也經云凡欲度人者先須求自度維摩云自疾不能救云何救他疾

又地獄報應經云自不清淨教人清淨無有是處智  
度論云譬如二人各有親屬為水所溺一人情急直  
入水救為無方便彼此俱沒一人有其方便往取舩  
筏乘之救接悉皆度脫水溺之難是故為人師者有  
度人之心無度人之智何得端然拱手空腹高心不  
肯親近明師惟知倨傲受人禮拜恭敬供養因貪虛  
譽實種禍基譬如凡夫妄號帝王自取誅滅即前之  
所謂無方便而救人也豈可妄為哉大凡為人之師  
欲度弟子要當觀照從上佛祖修行之因地得道之  
源流傳宗之正印念佛之法門一一攷究明白自信

自行一一修持一一成就既自利已然後利人是乘  
彌陀之大願力舩救接苦海中之沉溺也彼此利濟  
不亦宜乎是謂以先覺覺後覺也自信此法門亦教  
人信此法門自行此道亦教人行此道自願往生淨  
土亦教人發願往生淨土自見本性彌陀亦教人見  
本性彌陀如此用心豈不是行菩薩之行也師徒弟  
子各稟正因同行正道展轉化度盡未來際一切衆  
生俱悟佛乘同出生死其功德力豈易量哉以此為  
人之師亦何慊焉其或不然迷悟兩道正邪異報可  
謂金毛窟裏生獅子野狐巖下出狐狸

以事檢心

永明壽禪師自行錄云欽惟古聖罔伐己能緬想前賢靡彰自德然釋典有先自行化他之教儒宗標內舉不避親之文師常示徒云因觀弘明集中先德有檢覆三業門云夫剋責之情猶昧審的之旨未彰故以事檢校心凡所修習既知不及彌增悚慙何謂檢校檢我此身從旦至中從中至暮從暮至夜從夜至曉乃至一時一刻一念一頃有幾心幾行幾善幾惡幾心欲摧伏煩惱幾心欲降伏魔怨幾心念三寶四諦幾心悟苦空無常幾心念報父母恩慈幾心願代衆

生受苦幾心發念菩薩道業幾心欲布施持戒幾心欲忍辱精進幾心欲禪定顯慧幾心欲慈濟五道幾心欲勸勵行所難行幾心欲超求辦所難辦幾心欲忍苦建立佛法幾心欲作佛化度群生上已檢心次復檢口如上時刻從旦已來已得演說幾句深義已得披讀幾許經典已得理誦幾許文字已得幾迴歎佛功德已得幾迴迴向發願次復檢身如上時刻已得幾迴屈身禮佛幾拜已得幾迴屈身禮法禮僧已得幾迴執勞掃塔塗地已得幾迴燒香散花然燈已得幾迴掃除塵垢正列供具已得幾迴懸幡表刹合

宗卷六  
掌供養已得幾迴遠佛恭敬十百千而如是檢察會  
理甚少違道極多白淨之業纔不足言煩惱重障森  
然滿目闇礙轉積解脫何由如上檢察自救無功何  
有時間議人善惡故須三業自相訓責知我所作幾  
善幾惡是以若不自先檢責何以化導群機故菩薩  
為度衆生故先自修行所以淨名經云資財無量攝  
諸貧民奉戒清淨攝諸毀禁以忍調行攝諸恚怒以  
大精進攝諸懈怠一心禪定攝諸亂意以決定慧攝  
諸無智又經云自持戒勸他持戒自坐禪勸他坐禪  
大智度論云本師釋迦牟尼佛不捨穿針之福祖師

龍樹菩薩釋云如百歲翁作舞何以故為教兒孫故  
况未居究竟位全是自利門從十信初心歷十住十  
行十迴向十地直至等覺佛前普賢位猶是自利利  
他門者登妙覺位至佛後普賢方是利他之行因師  
自說編紀二三既對治之行可觀則攝化之門弗墜  
乘戒無急權實雙行体用相收理事無礙今引萬善  
同歸集後偈以顯圓修頌曰

菩提無發而發

佛道無求故求

妙用無行而行

真智無作而作

興悲悟其同體

行慈深入無緣

|        |        |
|--------|--------|
| 無所捨而行檀 | 無所持而具戒 |
| 修進了無所起 | 習忍達無所傷 |
| 般若悟境無生 | 禪定知心無住 |
| 鑒無身而具相 | 證無說而談詮 |
| 建立水月道場 | 莊嚴性空世界 |
| 羅列幻化供具 | 供養心王如來 |
| 懺悔罪性本空 | 勸請法身常住 |
| 迴香了無所得 | 隨喜福等真如 |
| 讚歎彼我虛玄 | 發願能所平等 |
| 禮拜影現法會 | 行道步踉真空 |

|        |        |
|--------|--------|
| 焚香妙達無為 | 誦念深通實相 |
| 散花顯諸無著 | 彈指以表去塵 |
| 施為谷響度門 | 修習空花萬行 |
| 深入緣生法性 | 常遊如幻法門 |
| 誓斷無染塵勞 | 願生唯心淨土 |
| 履踐實際理地 | 出入無礙觀門 |
| 降伏鏡像魔軍 | 大作夢中佛事 |
| 廣度如化含識 | 同證寂滅菩提 |

廬山蓮宗寶鑑念佛正行卷第六終

廬山蓮宗寶鑑念佛正願卷第七章

念佛正願說

理由智導行由願興行願得均理智兼備理智兼備則心心念念總是彌陀刹刹塵塵皆為淨土自非大願行力曷能臻此哉欲人人證此三昧者要在信願深其根本也夫願者樂也欲也欲生西方淨土樂見阿彌陀佛故談此願是以憑大願力直要到彼也所以慈照云時時發願樂慕往生日日禱祈勿令退失如無願心則善根沉沒華嚴經云不發大願是為魔事所以普賢廣無邊願海彌陀有六八願門是知十

方諸佛上古先賢皆因願力而得成就菩提不與願  
樂之心不成願樂之行故云法門廣大無願不成是  
以佛隨人之心滿人之願何況專修念佛願生淨土  
安得不遂心滿願哉懺云願我不退菩提心願我決  
定生安養願我速見彌陀佛願我盡生無別念唯心  
淨土獨相隨又阿彌陀經云若有信者應當發願願  
生彼國又懺云衆生無邊誓願度煩惱無盡誓願斷  
法門無量誓願學佛道無上誓願成此則謂之四弘  
誓願故我慈照集懺恐人著事迷理乃云自性衆生  
誓願度自性煩惱誓願斷自性法門誓願學自性佛

道誓願成此四句直明真理欲令一切人於自性中  
度了一切妄念衆生所謂邪迷雜想貪癡嫉妬嗔恚  
惡毒等心故令發大誓願自性自度也又於自性中  
斷除一切煩惱所謂塵勞業識邪思惡念猶如浮雲  
障覆自性光明不現故令發大誓願自斷除之永不  
令起又於自性中修學一切法門所謂念佛三昧悲  
智行願無量法門故令發大誓願自悟自修常無退  
失直至菩提不以得少為足又於自性中自信有佛  
發大誓願常自觀照自願成佛菩提此乃慈照老婆  
心切明明與後人開了一箇門戶只要你諸人自信

宗卷七  
自肯從這裏入頭悟自性彌陀達唯心淨土入諸佛  
境界成就無上菩提嗟乎世之善人不知此意向外  
別求何異持神珠而巡乞也可不惑乎普願見聞遍  
相勸策同興正念早上玄途覺前前非明後後位立  
大志氣奮大勇猛發大誓願誓度無邊衆生誓斷無  
盡煩惱誓學無量法門誓願往生西方極樂世界見  
阿彌陀佛誓同一切善人圓成無上佛道可謂不得  
春風花不開花榮須感春風力

勸發大願

慈照云有行無願其行必孤有願無行其願必虛無

行無願空住閻浮有行有願直入無為此乃佛祖脩  
淨業之根本也備觀今時信人歸投佛會或為病苦  
而羨心或為報親而舉意或為保扶家宅或為怖罪  
持齋雖有信心而無行願雖云念佛不達本根凡脩  
善緣皆為了還心願罕有為自己生死羨願念佛求  
生淨土者往往香燭道場祝願回向之辭皆是表獻  
神明消灾延壽而已故與經懺本意相違不合諸佛  
本願縱使一生脩誦不明理趣錯用工夫是謂終日  
數他寶自無半錢分也臨終所以不得往生淨土者  
蓋無行願故也又有一等癡人投佛受戒乃於三寶



前焚香誓願云我若破戒甘當惡病纏身永墮地獄  
或言左眼出血右眼出膿自肯自甘類官司之執結  
多見有口無心破齋犯戒自願受報痛苦奚堪甘心  
墮落之門自取喪身之兆殊不知佛祖興慈運悲何  
嘗教人如此皆是邪師過謬錯將罰呪以為發願耳  
何惑之甚哉予嘗憫念勸令同發正願求生淨土願  
同作佛彼則曰我是凡夫豈敢望生淨土要作佛耶  
我有此心又成妄想予應之曰不然善知識佛是覺  
也淨土是心也此心誰不有之覺即佛也迷則衆生  
也世人背覺合塵輪迴三界四生六道善惡業緣受

報好醜皆因妄認四大為我身六塵為實有隨他幻  
境日夜流轉未嘗暫省回光從生至老惟憂家緣不  
辦財不稱心愈多愈求愈貪不足雖曰積善奉佛禮  
拜作福燒香只願富貴榮華長生不死纔做些小好  
事便有伏願數般要保穀米盈倉蠶絲倍萬子孫光  
顯牛馬孳生纔有一不如意便怨佛不保全日日財  
喜增添始道天龍感應如此貪謀正是妄想自不知  
覺却言念佛求生淨土之說作妄想者豈不大顛倒  
乎凡曰作福盡屬有為蓋世間有漏之因非出世無  
為之道脩行佛子宜善思惟今日有緣得逢佛法當

須究本莫競枝條一念回光修出世法願捨娑婆願  
生淨土亦如久客在於他鄉思欲歸于故里也此願  
生淨土願作佛之心豈可比同凡夫妄想哉豈不見  
懺中云願我臨欲命終時盡除一切諸障礙面見彼  
佛阿彌陀卽得往生安樂刹者是也可謂一朝踏着  
來時路始覺從前錯用心

慈照宗主示念佛人發願偈并序

彌陀節要云念佛之人最急一事不善相應何以故  
雖云持戒念佛不曾發心願生淨土皆是埋頭過日  
自失善利大凡念佛先要發心欲超生死往生淨土

須以大願自為主意常須念佛早晚專心禮拜彌陀  
如朝帝主兩不失時日近日親心口與佛相應去佛  
不遠口念心想心願見佛發深重願決信無疑日久  
歲深工夫純熟自然三昧成就臨命終時彌陀接引  
淨土現前更願現生之內常遇善知識不值邪見師  
無惑我心不生懈怠若也如此念佛深信發願是信  
行願三不虧也臨終見佛卽非外来盡是唯心顯現  
猶如種子在地逢春發生豈是外来皆從地出也今  
之脩行亦甬念佛信願納在八識心地臨終發現淨  
土彌陀卽非外来皆從自心出也偈云

|       |       |       |
|-------|-------|-------|
| 萬法從心生 | 萬法從心滅 | 我佛大沙門 |
| 常作如是說 | 持戒無信願 | 不得生淨土 |
| 唯得人天福 | 福盡受輪迴 | 展轉難脫離 |
| 看經無慧眼 | 不識佛深意 | 後世得聰明 |
| 亂心難出離 | 不如念佛好 | 現世無名利 |
| 行坐不多羅 | 則是阿彌陀 | 談願持戒力 |
| 回向生樂國 | 正是合行持 | 千中不失一 |
| 釋迦金口說 | 彌陀親攝受 | 諸佛皆護念 |
| 諸天善護持 | 見此念佛法 | 與佛不相遠 |
| 應當坐道場 | 轉于大法輪 | 普度無邊眾 |

|       |       |       |
|-------|-------|-------|
| 譬如貧家女 | 腹孕轉輪王 | 諸天常愛護 |
| 貧女自不知 | 腹中有貴子 | 今此念佛法 |
| 其意亦如是 | 憶佛常念佛 | 不久當成佛 |
| 諸佛善護持 | 其人自不知 | 我當生淨土 |
| 却要來後世 | 再得生人中 | 譬如貧人家 |
| 地內有伏藏 | 藏神常守護 | 不令其有失 |
| 貧人自不知 | 家內有寶藏 | 逐日趁客作 |
| 求衣食自濟 | 今此念佛法 | 其意亦如是 |
| 不知念佛法 | 具足如來藏 | 自說我無分 |
| 返要生人中 | 譬如病人家 | 自有真妙藥 |

宗卷七  
六  
不知妙藥性 不能自治病 每日床枕邊  
痛苦受無量 今此念佛人 其意亦如是  
不知念佛心 能滅貪嗔病 能為大醫王  
能為大寶藏 利濟一切人 能為大法王  
覆護一切眾 將為是凡夫 不得生淨土  
且自持齋戒 後世願為人 展轉更脩行  
方可生彼國 多見修行人 常作如是說  
不稱彌陀願 不合淨土經 邪見障覆心  
畢竟難出離 非是他人障 皆是自障心  
今世不得生 一蹉是百蹉 勸汝修行人

信我如來說 佛無不實語 豈是虛誑言  
但當自精勤 一心求淨土 因風吹於火  
用力不消多 幸有念佛心 回願超三界  
逢寶不取寶 遇食受飢寒 咄哉大丈夫  
不見真實意 我今畧勸讚 展轉傳與人  
代我廣流通 作於如來使 真是諸佛子  
真名報佛恩 普願如說行 同生極樂國

求生淨土要在發願

智度論第八卷問曰諸菩薩行業清淨自得勝報何  
必要立誓願然後得之且如田家得穀豈復待願耶

答曰作福無願無所標立願為導御能有所成如佛  
所說若人脩少福少戒不知解脫正因聞說人天之  
樂心常願樂命終之後各生其中此皆願力所致菩  
薩求生淨土在乎志願堅剛然後得之以此故知因  
彼願力得受勝果古德云佛果負絕登之則有階法  
雲峻極屆之則有漸大心初發玄德照於來生弘誓  
纔興妙願徧於空界一念興志即塵劫之瑞華半刻  
虔躬乃大千之甘露大莊嚴論云佛國大事獨行功  
德不能成就要須願力資助引而成之以願力故福  
德增長不失不壞當生佛土隨願見佛華嚴經云是

人臨命終時寂後剎那一切諸根悉皆散壞一切親  
屬悉皆捨離一切威勢悉皆退失乃至象馬車乘珍  
寶伏藏如是一切無復相隨唯此願王不相捨離於  
一切時引導其前一剎那中即得往生極樂世界

善導和尚修行發願儀

修淨土入觀及睡時應發此願若坐若立一心合掌  
正面向十聲阿彌陀佛觀世音大勢至清淨大海  
衆菩薩竟發願云弟子現是生死凡夫罪障深重輪  
迴六道苦不可言今遇知識得聞彌陀名號本願功  
德一心稱念求願往生願佛慈悲不捨哀憐攝受弟

子某甲不識佛身相好光明願佛示現今我得見及見觀音勢至諸菩薩等彼世界中清淨莊嚴光明妙相等今我了了得見發此願已一心正念即隨意入觀或臨卧發願而睡或有正發願時即得見之或睡時得見但辦專志自然圓滿所願

白侍郎發願求生淨土文

記曰我本師釋迦如來說言從是西方過十萬億佛土有世界號極樂以無八苦四惡道故也其國號淨土以無三毒五濁故也其佛號阿彌陀以壽無量願無量功德相好光明無量故也諦觀此娑婆世界衆

生無賢愚貴賤無幼艾有起心歸佛者舉手合掌必向西方有怖厄苦惱開口發聲必先念阿彌陀佛又範金合土刻石綉紋乃至印水聚沙童子戲者莫不率以阿彌陀為上首不知其然而然由是而觀是彼如來有大誓願於此衆生衆生有大因緣於彼國土明矣不然則南北東西過去現在未來佛甚多矣何獨如是哉何獨如是哉唐中大夫太子少傅白居易當衰暮之歲中風痺之疾乃捨俸錢命工人杜敬宗按阿彌陀無量壽二經畫西方世界一部高九尺廣丈有三尺阿彌陀佛坐中央觀音勢至二大士侍左

右人天瞻仰眷屬圍繞樓臺伎樂水樹花鳥七寶嚴飾五彩彰施爛爛煌煌功德成就弟子居易焚香稽首跪於佛前起慈悲心發弘誓願願此功德回施一切衆生一切衆生有如我老者如我病者願離苦得樂斷惡脩善不越南部便覩西方白毫大光應念來感青蓮上品隨願往生從現在身盡未來際常得親近而供養也欲重宣此義而說讚曰極樂世界清淨土無諸惡道及衆苦願如我身老病者同生無量壽佛所

馮濟川施經發淨土願文

其畧曰予之施經一事而具二施何故以財續經是謂財施以經傳法是謂法施按佛所說財施後世當得天上人間福德之報法施當得世智辯聰蓋世之報當知此二報者皆是輪迴之因苦報之本我今發願願回此二報臨命終時莊嚴往生西方極樂世界蓮華為胎托質於中見佛聞法悟無生忍登不退增入菩薩位還來十方界內五濁世中普見其身而作佛事以今日財法二施之因如觀世音菩薩具大慈悲遊歷五道隨類化形說諸妙法開發未悟永離苦道令得智慧普與衆生悉得成佛乃予施經之願也

右出捨經碑馮察院施經不求人天路上富貴聰  
明而以此功德悉回向淨土願見彌陀可謂智識  
高明深達佛理大乘人也嗟見蓮社人終日念佛  
而求後世福報豈不謬哉予願一切人同生淨土  
故舉馮察院施經發願文與諸人作樣子凡有修  
福念佛乃至一毫之善悉皆發願回向西方有所  
歸趣臨終定生淨土也

廬山蓮宗寶鑑念佛正願卷第七終

廬山蓮宗寶鑑念佛往生正訣卷第八 一十二章

念佛往生正訣說

淨土之道往生一門具載群經明如杲日實修行者  
入道之方乃念佛人棲神之所無念之念念即念於  
阿彌無生之生生則生於淨土是故深行菩薩歷代  
師模名卿巨儒庶民氏女篤信斯道結誓進修者不  
可勝計其意何哉必欲生淨土見阿彌而後已須知  
佛本無身亦無其土皆衆生心淨所由致感也經不  
云乎是心作佛是心是佛諸佛正徧知海從心想生  
故天台大師釋之曰佛本是無心淨故有良以衆生



心淨則法體現前衆生心染則苦道流轉此乃理之常也又何疑乎以圓實教所談唯心本具者若此若彼若染若淨皆不越吾心之一念也夫心者造罪之源成佛之本所謂介甬有心三千具足然而三千諸法既具十界十如三種世間互具而顯則安養國土捨此何求非但淨土唯心蓋地獄亦唯心矣又云阿鼻依正全趣極聖之自心身土毘盧不逾下凡之一念纔起悟迷之見便入邪流不分染淨之殊方歸正道刀山劍樹總是空華寶渚金蓮皆成夢事如斯受用始了真修脫或未然宜依權漸而加修進深信阿

彌陀佛即我本性貴在禮誦懺念之間行住坐卧之處照於三觀契乎一心全智發境全境是心故知佛正佛依皆是心具心造信哉淨土彌陀昭昭然影現于心目之間譬如磨銅成鏡必假施功直使塵垢淨盡無餘則本體圓明自然顯現一切色像俱無隱焉當知鏡中之像若謂是有不可承而攬之若謂是無則色像歷然可見所謂有不定有無不定無有無雙遣任運是中矣哉不思議境唯心妙觀之道也欲證斯道必明于因當知因該果海果徹因源原始要終不離一念從因至果只在初心苟能於此善脩如

是之因至於臨終必獲如是之果是知專心念佛為因往生淨土為果始從聞信信以修持積淨業之工夫得功緣之成滿時節既至大理昭然視死如歸豈不慶快故茲直示往生正訣明指到家路頭此時自信不疑他日出門不誤如此則安養國土何患不生自性彌陀決然可見與夫列聖郡賢同成淨行歷位至極者實惟斯道矣

父母臨終往生淨土

諦信淨土發心念佛者蓮池下種時也一心念佛眾善莊嚴者蓮華出水時也念佛功成淨土緣熟華開

見佛時也佛子事佛固先事親拳拳孝念不捨須臾順父母之情懷察父母之顏色纔垂攝養力為調和又當念風燭不停須防往生時至預以父母平生所脩一切善緣好事及眾人助脩功德聚為一疏時時對父母讀之要令父母心生歡喜又當勸令坐卧西向不忘淨土又當東向設彌陀像勸令一心念佛焚香鳴磬躬率眾人同聲和之常使佛聲相續不絕無以世情悲戀恐失正念臨捨報時猶當用意自然諸聖來迎往生淨土寶蓮花中決定成佛孝子侍養父母正在此時不宜懈怠此孝子事親臨終之大事也

以此為孝其孝至矣又况從古以來念佛往生西方者非一畧舉數條以為念佛者鑑所以為長國王觀衆聖以來迎隋文皇后乘異香而西邁姚行婆請佛相待宋世子侍母同歸可謂一超直入如來地矣

臨終三疑

慈照宗主淨土十門告誡云念佛人臨終三疑不生淨土一者疑我生來作業極重脩行日淺恐不得生二者疑我欠人債負或有心願未了及貪嗔癡未息恐不得生三者疑我雖念彌陀臨命終時恐佛不來迎接有此三疑因疑成障失其正念不得往生故念

佛之人切要諦信佛經明旨勿生疑心經云念阿彌陀佛一聲滅八十億劫生死重罪上至一心不亂下至十念成功接向九蓮令辭五濁苟能心心不昧念念無差則疑情永斷決定往生可謂十萬億程彈指到絲毫擬議隔千山

臨終四關

四關者慈照宗主淨土十門告誡云凡夫雖有信心念佛緣為宿業障重合墮地獄棄佛力故於床枕間將輕換重若也因病苦故悔悟身心當生淨土也無智之人不了此事却言我今念佛又有病苦反詢彌

陀因此一念惡心徑入地獄此是一關也二者雖則持戒念佛緣為口談淨土意緣娑婆不求出世善根為愛家緣長旺以致臨終遭病怕死貪生信受童兒呼神喚鬼燒錢化馬殺戮衆生緣此心邪無不捍護因茲流浪墮落三塗是二關也三者或因服藥須用酒醒或被親情逼相逼勸此人無決定信喪失善根臨終追赴王前任王判斷是為第三關也四者臨終之際思惟活業繫綴資財愛戀眷屬心放不下失却正念故於家舍墮鬼趣中已為禍祟或為慳犬或作蛇身守護家庭宛如在日是為四關也是以楊提刑

言愛不重不生娑婆念不一不生淨土誠哉是言凡修淨土者要當酌實蠲浮息專想寂念念彌陀全身放下但能堅此一念便可碎彼四關則淨土蓮臺的非遙矣可謂一句彌陀無別念不勞彈指到西方

臨終決疑撮要

凡修念佛之人欲生淨土每念世間一切無常成必有壞生必有死若不親聞佛法即捨身受身輪轉三界四生六道無解脫期我今有緣得聞正法得修淨業唯佛為念捨此報身當生淨土入彼蓮胎受諸快樂永脫生死不退菩提此乃大丈夫平生之能事也

終有疾病正要向前坦蕩身心莫生疑慮直須西向  
正坐專想阿彌陀佛與觀世音大勢至菩薩及無數  
化佛現在其前一心稱念南無阿彌陀佛聲聲不絕  
於諸世間一切事務不得思念不得貪戀若或心念  
起來但要急稱佛號於念念中除滅罪障若病人昏  
困不能自念則看病人當方便警策勸而喻之如此  
用心助令命盡只此一念決定往生淨土命若未盡  
自得安寧慎勿妄起留戀世間之心當存自存當死  
須死但辦往生何須疑慮若解此理如脫弊服以著  
上衣一捨凡身便登佛地奇哉偉哉至矣盡矣或聞

天樂異香或見金蓮寶座此乃聖境現前慎勿疑為  
魔事經云脩淨業者托佛願力觀佛寶相為境故如  
人近附帝王誰敢干犯况阿彌陀佛有大慈悲力有  
大誓願力有大智慧力有大三昧力有大威神力有  
大摧邪力有大降魔力有天眼遠見力有天耳遙聞  
力有他心徹鑑力有光明遍照攝取眾生力有如是  
等不可思議無量最勝功德之力豈不能護持修行  
念佛之人至臨終時令無魔障生淨土哉可謂焚骨  
碎身未足酬一句了然超百億

僧濟臨終注想西方

廬山尊者弟子僧濟臨終之際尊者遺燭一枝曰汝  
可運想西方濟執燭注想金容攝心無亂復請僧衆  
誦十六觀經五更濟以燭投同袍遂假寐及悟曰吾  
夢見阿彌陀佛垂手接引吾當去矣言訖右脇而逝  
此非戒定慧之所熏脩而豈能溫容軟語於生死岸  
頭耶可謂得路便行無罣碍等閑抹過死生關

善導和尚臨終往生正念文

知歸子問曰世事之大莫越生死一息不來便屬後  
世一念差錯便墮輪迴小子累蒙開誨念佛往生之  
法其理甚明又恐病來死至之時心識散亂仍慮他

人感動正念忘失淨因伏望重示歸徑之方俾脫沉  
淪之苦師曰善哉問也凡一切人命終欲生淨土須  
是不得怕死常念此身多苦不淨惡業種種交纏若  
得捨此穢身超生淨土受無量快樂解脫生死苦趣  
乃是稱意之事如脫弊衣得換珍服但當放下身心  
莫生戀著凡遇有病之時便念無常一心待死叮囑家  
人及看病人往來問候人凡來我前為我念佛不得  
說眼前閑雜之話家中長短之事亦不須軟語安慰  
祝願安樂此皆虛花無益之語若病重將終之際親  
屬不得垂淚哭泣及發嗟嘆懊惱之聲惑亂心神失

其正念但一時同聲念佛待氣盡了方可哀泣纔有  
絲毫戀世間心便成罣碍不得解脫若得明曉淨土  
之人頻來策勵極為大幸若依此者決定超生即無  
疑也又問曰求醫服藥還可用不答曰求醫服藥初  
不相妨然藥者只能醫病不能醫命命若盡時藥豈  
奈何若殺物命為藥以求身安此則不可余多見世  
人因病持齋方獲小愈復為醫者以酒食血肉佐藥  
其病復作信知佛力可救酒肉無益也又問曰求神  
祈福如何答曰人命長短生時已定何暇鬼神延之  
耶若迷惑信邪殺害衆生祭祀神鬼但增罪業反損

壽矣大命若盡小鬼奈何空自懺惶俱無所濟切宜  
謹之當以此文帖向目前時時見之免致臨危忘失  
又問曰平生未曾念佛人還用得不答曰此法僧人  
俗人未念佛人用之皆得往生決無疑也余多見世  
人於平常念佛禮讚讚願求生西方甚是勤拳及至  
臨病却又怕死都不說着往生解脫之事直待氣消  
命盡識投冥界方始十念鳴鐘恰如賊去關門濟何  
事也死門事大須是自家着力始得若一念差錯歷  
劫受苦誰人相代思之思之若無事時當以此法精  
進受持是為臨終大事可謂一條蕩蕩西方路徑直

歸家莫問津

化佛來迎

宗鏡錄或問曰心外無佛見佛是心云何教中說有化佛來迎生諸淨土答曰法身真佛本無生滅從真起化接引迷根以化即真真應一際即來不去隨應物心又化體即真說無來去從真流化現有往還即不來相而來不見相而見也不來而來似水月之頓呈不見而見猶行雲之忽現問如上所說真體即湛然不動化相即不來而來正是心外有他佛來迎云何證自心是佛答曰此乃是如來本願功德力故

令彼有緣衆生專心想念能令自心見佛來迎不是諸佛實遺化身而來迎接但是有緣時機正合能令自心見佛來迎則佛身湛然常寂無去無來衆生識心託佛本願力一念變化有去有來如鏡面像似夢施為鏡中之形非內非外夢中之事不有不無但是心生非關佛化真信脩行之士端的是要生西方極樂世界專意一念持一句阿彌陀佛只此一念是我本師只此一念即是化佛只此一念是破地獄之猛將只此一念是斬群邪之寶劍只此一念是開黑暗之明燈只此一念是度苦海之大船只此一念是脫



生死之良方只此一念是出三界之徑路只此一念是本性彌陀只此一念達唯心淨土但只要記得這一句阿彌陀佛在念莫教失落念念常現前念念不離心無事也如是念有事也如是念安樂也如是念病苦也如是念生也如是念死也如是念如是一念分明不昧又何必問人覓歸程乎可謂行船盡在把梢人達者同遊涅槃路

賢首菩薩臨終讚念佛偈

又放光明名見佛 此光覺悟將終者  
令隨憶念見如來 命終得生其淨國

見有臨終勸念佛 及示尊像令瞻仰

俾於佛所深歸信 是故得成此光明

天竺慈雲式懺主云前四句讚佛放光見其光者名爲見佛能令臨命終時淨土往生後四句讚佛修此光明之因其回者祇是勸臨終人念佛并示其佛像令彼見已生信故成佛時得此光明今以偈普勸信受凡遇眷屬及一切人臨命終時先於床前安置此像令彼眼見及勸令念佛若痛苦所逼或先無信心不肯念者亦須種種方便勸令稱佛下至十念得滅重罪生佛淨土此一利益不可思議若勸得一人生

淨土縱自不修行亦合得生淨土况當來成佛能放光明照一切衆生臨終見佛也多見世人爲恩愛故聚頭哭泣不思救度是名惡知識也苦哉苦哉恩愛所牽墮落惡道無解脫期雖慈親孝子亦不奈何以此思之可不勉哉可謂普願沉溺諸衆生速往無量光佛刹

情想多少論報高下

首楞嚴經云佛告阿難一切世間生死相續生縱順習死從變流臨命終時未捨煖觸一生善惡俱時頓現純想即飛必生天上若飛心中無福無慧及與淨

願自然心開見十方佛一切淨土隨願往生情少想多輕舉非遠卽為飛仙情想均等不飛不墜生於人間想明斯聰情幽斯鈍情多想少流入橫生重為毛群輕為羽族七情三想沉下水輪生於火際受氣猛火身為餓鬼常被焚燒水能害已無食無飲經百千劫九情一想下洞火輪輕生有間重生無間二種地獄純情即沉入阿鼻獄若沉心中有謗大乘毀佛禁戒誑妄說法虛貪信施濫膺恭敬五逆十重更生十方阿鼻地獄

命終善惡感報優劣

守護國界主經云佛言若人命終之時預知時至正  
念分明洗浴着衣吉祥而逝光明照身見佛相好衆  
善俱現定知此人決定往生淨土若人念佛持戒無  
精進心命終亦無善相亦無惡相地府不収安養不  
攝如睡眠去此人疑情未斷生於疑城五百歲受樂  
再脩信願方歸淨土若人起憐憫心正念現前於財  
寶妻子心無愛戀眼色清淨仰面含笑想念天宮當  
來迎我耳聞天樂眼見天童捨此報身定生天界若  
人生柔軟心起福德心身無病難憶念父母妻子於  
善於惡心不錯亂其心正直遺囑家財辭別而去定

生人界若人於已眷屬惡眼瞻視舉手捫空便利不  
覺身常臭穢兩目紅赤仆面而卧蹠身左脇百節酸  
疼或見惡相口不能言呻吟叫喚冤債現前心識散  
亂狂惑顛倒徧體如冰手捻拳死身硬如石此人命  
終定入地獄若人好舐其唇身熱如火常患飢渴好  
說飲食張口不合貪戀財寶命卒難斷開眼而去此  
人定入餓鬼若人身染重病如在雲霧心神昏散怕  
聞佛名多愛食噉血肉之味不受勸化愛戀妻兒蹠  
手足指徧身流汗出麤澁聲口中吐沫此相現前定  
入畜生

臨終十事不克念佛勉勸預修

凡夫業重處處貪生若不預辦工夫臨終不克念佛  
天台十疑論云臨終念佛名最後心其心猛利一念佛  
名即生淨土蓋垂死時其心猛健決定故勝百歲行  
力也或問曰臨終念佛即得往生何假預修勝業答  
曰人生壽夭難測長短或即病困昏迷或即非時奄  
逝既闕生前之善難逃後世之殃須預作於善緣是  
恐防於斯咎十種命終不克念佛一者善友未必相  
逢二者或疾苦纏身神昏性亂三者偏風失語不得  
稱名四者狂亂失心注想難克五者或逢水火不暇

混性堂就善伏為父母

志誠六者輒遇虎狼驚惶倉卒七者臨時惡友破壞  
道心八者飽食過多昏迷致命九者軍作鬪戰忽爾  
身亾十者或墜高巖傷中身命故知臨終難保吉凶  
須是預先脩習可謂閑時做下急時用免得臨期手  
脚忙

廬山蓮宗寶鑑念佛往生正訣卷第八終

信女善藝華林氏伏為父母

廬山蓮宗寶鑑念佛正報卷第九

念佛正報說

因修白業果感淨方化佛引上金臺賢聖迎歸樂國  
高超三界迥出四流業盡塵消亡情絕慮質托蓮苞  
之內神遊寶界之中面奉阿彌陀佛為本師得見觀  
音勢至為親友清淨海眾大會寶池九品勝流各說  
本行五香拂體三德嚴身暫扇微風聆眾音之演法  
繽紛花雨覩談網之舒光縹緲雲霞近浮神足輕盈  
衣袂盛接妙華晨謁慈顏得法印而還國暮遊金刹  
聽王偈以逍遙瑞蓮初綻為遣殘殃新學化生行成

不退豈惟近忘屢苦抑亦佛果非遙戲玩瓊林灌沐  
德水百寶之樓閣華麗七重之行樹森嚴景序長春  
地平如掌衣食隨念而至天樂不鼓自鳴受用出於  
自然快樂實非人世諸天萬億倍不可比論諸佛恒  
河沙悉皆稱讚身具光明妙相跡踐聖道香階壽命  
難量悲願無盡捨兩重生死既非果趣之身獲本際  
常光永離去來之相緣強德勝皆由念佛心生福備  
壽長盡是淨因感報故知佛有攝生之願生有感佛之  
因如是勝緣起於信願以斯妙果成就正依或禪誦  
七寶池邊或經行黃金地上飽禪悅法喜瓊味掛慈

悲喜捨天衣功德資神增加悲智雍容辦道長養聖  
胎入無生門便登菩薩之位得阿跋致不退菩提之  
心住法王家盡授如來之記聞大乘法同稱補處之  
尊念念虛玄心心靜慮得三昧正定具六種神通獻  
供十方往來無碍分身億刹不失定心灑法水於三  
千出衆生於火宅自他兼利行願周圓可謂百千三  
昧盡唯心功德莊嚴歸自己

### 功德莊嚴

大彌陀經菩薩功德章云往生彼國者皆悉容貌柔  
和相好具足禪定智慧通達無礙神通威德無不圓

滿深入法門具無生忍諸佛秘藏究竟明了調伏諸  
根身心柔軟安然寂靜盡般泥洹深入正慧無有餘  
習依佛所行七覺聖道修行五眼照真達俗辯才總  
持自在無礙善解世間無邊方便所言誠諦深入義  
味敷演正法度諸有情等觀三界空無所有知一切  
法無相無為無取無捨遠離顛倒堅固不動如須彌  
山智明如日廣大如海出功德寶熾盛如火燒煩惱  
薪忍辱如地一切平等清淨如水洗諸塵垢如虛空  
無邊不障一切故如蓮花出水離一切染故如雷震  
響出法音故如雲鬘鬘降法雨故如風動樹發菩提

芽故如牛王聲異衆牛故如龍象威難可測故如良  
馬行乘無失故如獅子王無怖畏故如尼狗律樹覆  
蔭大故如優鉢羅華難值遇故如金剛杵破邪山故  
如梵王身生梵衆故如金翅鳥勝毒龍故如空中禽  
無住跡故如雪山照功德淨故如慈氏觀法界等故  
專樂求法心無厭足常欲廣說志無疲倦擊法鼓建  
法幢曜慧日除癡冥脩六和敬常為師導為世明燈  
寂勝福田以安群生功慧殊勝莫不尊重恭敬供養  
無量諸佛常為諸佛所共讚嘆究竟菩薩諸波羅蜜  
遠離聲聞緣覺之地佛告阿難彼諸菩薩以念佛故

成就如是無量功德我但為汝舉要言之若廣說者  
雖盡億劫不能窮盡

淨土增脩聖果

大彌陀經云諸念佛人生淨土已即入七寶池中澡  
雪形體蕩滌情慮各坐一華上自然微風吹動諸寶  
行樹出微妙音散諸寶華異香芬馥皆作佛事聞者  
喜悅無量自然心開各往脩進有在地講經者有在  
地誦經者有在地說經者有在地口授經者有在地  
聽經者有在地念經者有在地思道者有在地坐禪  
一心者有在地經行者有在虛空中講經者有在虛空

中誦經者有在虛空中說經者有在虛空中口授經  
者有在虛空中聽經者有在虛空中念經者有在虛  
空中思道者有在虛空中坐禪一心者有在虛空中  
經行者其間聲聞弟子皆發大心有未得聖果者因  
是而得聖果有未得不退轉地者因是而得不退轉  
地菩薩各隨其資而有所得莫不忻然適意而悅遊  
戲三昧利樂有情由念佛之堅心稱彌陀之本願往  
生佛子同列此班智慧辯才神通如意風帆勢順速  
證菩提超萬劫之輪迴得諸天之仰重淨業勝善大  
果昭然寄語同流無忘此事螻蛄動蛸飛猶有分大丈



夫兒當勉旃

淨土三十益

天台智者大師淨土群疑論云生西方者有三十種  
 益一往生佛土益二得大法樂益三親近諸佛益四  
 遊歷十方供佛益五親聞佛說益六福慧資糧疾得  
 圓滿益七速證菩提益八諸天人等同集一會益九  
 無退轉益十無量行願增進益十一鸚鵡舍利宣揚  
 法音益十二風樹樂響益十三摩尼水漩演苦空益  
 十四諸樂奏妙音益十五四十八願益十六真金色  
 身益十七形無醜陋益十八具足六通益十九常住

定聚益二十無諸不善益二十一壽命長遠益二十  
 二衣食自然益二十三唯受眾樂益二十四三十二  
 相益二十五實無女人益二十六無有小乘益二十  
 七離於八難益二十八得三法忍益二十九身常有  
 光益三十得那羅延身力益可謂處處菩提道明明  
 功德林

淨土成佛

金剛定後菩薩因願解脫道中如來果滿具四無量  
 心得四無礙辯十八種法不共二乘十力現前說法  
 無畏塵沙惑盡萬行功成十號俱彰三身圓顯具九

宗卷九  
五  
十七種大人相放八萬四千大光明悲智俱融福慧  
雙足現居十重報土能垂萬類化身布大慈雲兩大  
法雨滂流法界潤澤群生咸悟本心同成正覺○選  
佛若無如是眼宗風那得到如今

廬山蓮宗寶鑑念佛正報卷第九終

廬山蓮宗寶鑑念佛正論卷第二十五章

念佛正論說

夫奉教念佛之士叨法王之遺蔭作如來之所使必  
以摧邪顯正激濁揚清爲後學著龜作生靈耳目爲  
已任也苟弗能而默默自守則尸祿備員於佛門矣  
雖講授亦奚以爲豈不聞因筌然後得魚體教然後  
修行名教未正行如之何哉故不得不論也是以仲  
尼爲政正其不正沮滌遺誠急在糾過余嘗觀吾佛  
世尊之王西竺也象無象之象言無言之言以復羣  
生之性由是頓教漸教大乘小乘盈溢乎龍宮海藏

無非摧邪顯正激濁揚清之旨而大地生民率其化而復其性者可勝計乎其間偏讚西方謂捷徑修行之道者蓋以阿彌陀佛有廣大願力攝娑婆衆生而歸淨邦是令反妄而證真也所以諸佛共讚菩薩同遵晉社創修千古之高風不墜慈照集懺十方之正化流通大矣哉淨土之道其爲體也以彌陀即本性其爲宗也以淨國即惟心其爲用也以仁恕即滅惡生善此之三者蓋顯三世報應制其事一心空寂窮其理俾達乎理者反其妄信其事者遷乎善以斯而利于上下實助於周孔之教贊翊皇化其亦至矣使

一人能行是道以訓于家家以導於鄉鄉以達於邦以至於無窮則天下之民涵道泳德融神實相高步無何而極佛境界豈止以爲善人君子而已哉夫如是則何患乎忠孝不修禮讓不著歟以此觀之豈非能仁之道與仲尼之道共爲表裡以訓于民耶泊乎歷朝敬之廣其教像法事之非其人廣其教則弊倖生非其人則淳朴泯而乃以佛堂高大爲奢誇聲利溫飽爲能事徒以多爲貴則壞其道者衆矣言以怪爲羨則惑其聽者庶矣迺相訟襲以成鄙吝日復一日紅紫亂朱使夫清靜仁恕之風消蕩矣於是蚕食

蠹耗之謗由茲而盛焉斯乃敬之事之者之失非其  
教之咎也今之人多不察其所由視其徒之不肖者  
而遷怒於善人教法焉亦何異乎以丹朱而罪堯因  
商均而過舜服藥失度歸咎於神農縱火致焚反怨  
於燧人也耶愚乃不佞學佛之道有年矣既粗領其  
旨而頗有扶傾之心非敢私於己而欲公於衆以救  
其弊也嘗謂教門之利害有四一曰師授不明邪法  
增熾而喪其真二曰戒法不行綱常紊亂而犯其禁  
三曰教理未彰譌談非義而惑其衆四曰行願不修  
迷入邪歧而墮於魔由是亂名改作聾瞽後學非止

一端可傷乎哉自是叨濫之徒一以傳十十以傳百  
百以千萬流毒於海內速若置郵何以知其然正說  
難行邪風易染此必然之理也噫祖道之不傳也久  
矣欲人之無惑者難矣吾雖不敏而實悲焉思欲分  
條析理廣彼前聞截偽續真開茲後學恨無慧辯徒  
事管窺由是齋沐一心投誠三寶詢求大教叅考玄  
文楷定正宗破諸異說總成念佛正論剖證佛祖格  
言普告諸方咸躋覺路庶使聖教隱而復彰衆生罪  
而還福有客至而問之曰修行了自己生死何須論  
他人長短予應之曰理不然也豈不聞如來出世無

一法不是利生菩薩修行肯纖毫而為自己佛子示  
同外道方便轉彼邪心楞嚴十種魔民皆因錯解華  
嚴十類魔業示其正歸嗟惡慧之邪修自甘心於險  
道遇斯境界豈可緘言念彼愚痴寧容坐視况世尊  
悲心付囑留大願而普濟迷津菩薩如教修行示同  
事而化令成佛是其本行夫復何疑如其見迷路而  
不指正途慈悲安在覩沉溺而不思拯接方便何存  
隨順正法而破魔是無上大智之業調伏衆生而入  
道是諸佛之所攝持誓當捨命而立真宗終不為已  
而忘佛囑衆生盡而悲心益固空界殞而我願無窮

坤命乙酉生李氏伏為父母

倘逢有識之賢必能助弘斯道可謂將此深心奉塵  
刹是則名為報佛恩

### 西方彌陀說

佛說西方極樂世界其土有佛號阿彌陀如經所載  
有理有迹論其理者西方即自性也此性無形無相  
不變不壞歷劫堅剎譬彼精金在易卦則曰允為寂  
靜故謂之西方也金者其色明金體白淨舉之喻法  
性蓋世間之人迷於塵境妄念不息紛然動作在易  
卦則曰震故謂之東方也人能反妄歸真復其本靜  
得見自性即名捨東方執著之穢土登西域淨明之

金地也在方無方以法喻表其理體華嚴合論謂文殊自東方來者蓋文殊是根本不動智也東是萬物發生震動之者初明之地從此智則生信故華嚴以信位為初生佛家丑寅之間為清朝智日初明像文殊發起凡夫入信見道智門漸增故巽為風為教化風能去穢揀淨辰巳之間上應角宿為僧道為齋戒為眾善之門喻進修地位至午為中道易卦曰離為南方為正為日為明麗離中虛故明像諸法空則智日當陽徧照天下法華龍女南方成佛是其義也西南為坤為地為安靜為柔順為母為生養正西為兌

金旺之地日沒之所火死在酉為肅寂為收藏西北為乾為天為父為金為剴健北方為坎為水為君為師利生濟物垂教正治以水制火以君對臣臣明君正又水多則濫故東北為艮為山為止下方為禪定為謙下上方為觀照為智慧為空界如日月三光處空照臨萬物也經中不舉餘方而單指西方者蓋取淨對穢也以悟攝迷也以靜對動也以果對因也過十萬億國土者出四維上下十方之限量也超乎四惡道之十惡業也越乎人天十善之境界也不為諸法之所拘也有世界者真如實際理地即自性西方

宗卷十  
五  
極樂者卽言此性無憂惱也何以知其然見性之人  
不爲塵境惑了知諸法空心常坦然無念無爲無思  
無慮安住大寂滅之地念念常生智慧法法皆如我  
爲法王於法自在故名極樂也論其迹則實有此箇  
世界也佛叮嚀詳復言之豈虛語哉有者非方域處  
所之有乃不有之有卽是真空妙有也真空者卽是  
實相妙有者森羅眩目法界交叅豈有東西之辨哉  
圓覺經云一切如來光嚴住持是諸衆生清淨覺地  
平等本際圓滿十方不二隨順於不二境現諸淨土  
阿彌陀是梵語此云無量壽也佛者覺也卽當人分

上廣大圓覺之性清淨法身之佛也此性不生不滅  
亘古亘今上至諸佛菩薩下至六道衆生各各具此  
覺性所以稱同名同號也噫世人昧之久矣妄取色  
相顛倒馳求甘自沉淪我佛應世開方便門讚說淨  
邦令其信慕苟能自肯自信方悟堅明爲西方盡西  
矣惑火滅盡土皆淨焉則知十方世界總是彌陀觸  
目遇緣無非極樂百千三昧應念現前無量法門隨  
心顯發高超徹見是樓閣含育利生名宮殿防非護  
善名欄楯清淨無染是蓮華徹底澄清謂之池隨方  
逐圓謂之水仁慈濟利謂之寶戒定慧薰謂之香七

菩提樹覆陰重重八聖道路遊行坦坦衆善莊嚴花  
簇秀萬德成就果周圓化禽演於法音風樹傳於道  
品到這般田地更要保持涵養直至命終永無退失  
脫然而去方為了事其或未然切不可遺山認培棄  
寶捨新妄認色身便為究竟信知生死事大莫作等  
閑尋訪真知決擇心要確實念佛求悟大乘了見本  
性彌陀直達唯心淨土可謂雖然舊閣閑田地一度  
羸來方始休

真如本性說

真如本性者父母未生已前一真無妄之體謂之本

來面目禪宗則曰正法眼藏蓮宗則曰本性彌陀孔  
子則曰天理大易則曰太極名雖有異其實同一真  
如本性也此性虛而靈寂而妙與天地同根萬物一  
本歷塵劫而不朽世界壞而不遷人不能任其自如  
之真而枯於地水火風和合之質方其受形也已為  
陰血濁氣昏其本然清淨之體及其生也六塵五欲  
之迷倒昧於本有之天真是故佛說八萬四千法門  
皆是導人反妄而歸真也其捷徑易行者惟念佛一  
門脩之者心不散亂三昧現前是復其本性也今有  
一等不究佛理之人却將道門脩養法冒濫蓮宗妄



說氣是主人教人般精運氣勞其筋骨枉用身心甘  
受苦辛終無所濟嘗觀道門張紫陽說精氣神者先  
天地之元精元氣元神也元精非淫泆之精元氣非  
呼吸之氣元神非念慮之神癡人不曉此意喚甕作  
鍾眼既不明理亦不達矯誘他清信之士一向在臭  
皮袋上造作昧却一真佛性妄言此是脩行可悲也  
哉普告同脩切宜仔細究心念佛啓悟真源若也了  
了自見法法現前是名見性成佛一念差錯天地懸  
殊

辨真妄身心

夫身者有法身有色身傳曰智明真境盡法為身故  
曰法身父母緣生虛幻不實故曰色身心者有真心  
有妄心真淨明妙虛徹靈通故曰真心隨境生滅忽  
有忽無故曰妄心祖師勸修念佛三昧者於自己真  
心中流出一句阿彌陀佛念念觀照法法圓通是謂  
都攝六根淨念相縑於一念中普現色身三昧今時  
有一等人不知真妄錯認色身為我身以妄念為究  
竟多是吐納按摩做模打樣希望成道不亦謬乎可  
謂棄却真金而拾瓦礫也大凡學道要辨真偽故宗  
鏡云脩道以心為宗理須仔細究竟約有情界真妄

似分不可雷同有濫圓覺金鑛共執真偽繞分沙米  
同炊生熟有異三乘慕道見有差殊錯指妄心以為  
真實認妄賊為真子劫盡家珍收魚目作驪珠空迷  
智眼遂使愚癡之子陷有缺之重關邪險之人溺見  
河之識浪戲熾焰於朽宅妄苦妄疲卧大憂於長宵  
迷心迷性皆由執斯緣慮作自己身遺此真心住他  
聲色斯則凡夫外道之失也或有法學禪宗執佛方  
便致使撒開八網乘對四機越一念而遠驟三祇功  
虛大劫離寶所而久淹化壘跡因長衢斯則迷循妄  
心不得真心之失也心賦云性非造作理實鎔融明

之者即動而靜昧之者迷西作東任竭海移山未是  
無為之力縱踉虛履水皆為有漏之通辨王須真探  
珠宜靜若向境外以求心焉知圓光而在皆順法界  
性合真如心此則頓入如來大慈悲海化之著相脩  
皮袋者豈可同日而語矣

### 辯明三寶

教云十方薄伽梵圓滿脩多羅大乘菩薩僧功德難  
思議三寶者有三種一曰同體三寶謂真如之理自  
性開覺名為佛寶德用軌則自性正真名為法寶動  
無違諍自性清淨名為僧寶二曰出世三寶謂法報

化身隨類應現是為佛寶六度詮旨四諦緣生名為  
法寶十地菩薩四向五果名為僧寶三曰世間住持  
三寶謂泥龕塑像名為佛寶黃卷赤紐名為法寶剃  
髮染衣名為僧寶皈依者感諸天護持供養者獲福  
田無量今有邪愚不詳偽撰真宗妙義經妄言精是  
佛寶氣是法寶神是僧寶遞相傳習致使入善門者  
信其邪說不敬三寶實可憐憫若夫不敬世間三寶  
則自昧其心自昧其心則迷失本性同躰出世三寶  
何所得哉自賺猶可又賺他人可謂歧人天之正路  
瞎人天之正眼昧因果之真教澆定慧之淳風無甚

於此也佛言一切衆生若不皈依三寶永劫墮三惡  
道况我慈照集經成懺使學者依大乘經甚深妙義  
從今身至佛身為法界衆生皈依常住佛皈依常住  
法皈依常住僧正信善人既已得聞聞已誦禮固當  
自敬自信卽此敬信之心端可近於佛道矣凡見一  
切佛像起如來想見一切聖教生難遭想見一切比  
丘僧起祖師想禮拜供養無得輕欺以佛莊嚴而自  
莊嚴如此則一躰三寶唯心備具矣若也執於鄙見  
昧其根本妄信邪教疑誤後人自取沉淪永溺惡趣  
是誰之咎歟

辨見聞覺知

古德云在胎為身處世名人在眼曰見在耳曰聞在鼻嗅香在舌談論在手執捉在足運奔徧現俱該沙界攬撮在一微塵識者知是佛性不識喚作精魂此來有等愚人不知佛理潛吾教中專以傳受為宗妄說六門見性指四大色身以為佛躰自立三十六關七十二信捏合恠事誑惑善人妄謂這邊肉動某人來那裏疼痛某事至吉凶禍福言是先知愚者得聞將謂佛法靈感傾心諦信布施供養傳此邪言切切記心未嘗暫捨殊不知一真佛性清淨湛然為有妄身

乃有妄識蓋覆本性不見光明一念心空名為悟道故楞嚴云知見立知即無明本知見無見斯則涅槃是故祖師立教但以念佛三昧為正宗未嘗有毫髮許實法繫綴於人何期蚩蚩薄俗迷宗昧旨棄忠孝而不履背仁義而不脩假蓮宗之名行差別之法貪求真感以竒恠惑人則有邪魔魍魎附人身躰撓亂正信盡遭魔攝可不悲哉大凡脩淨業人善察邪正本分究心確辦信誠憶佛念佛願生淨土慎勿他求智覺壽禪師云莫摘枝苗須搜祖禰豁爾而無明頓開湛然而情塵自洗可謂直截根源佛所印摘葉尋

枝我不能

破妄說灾福

夫佛祖正法以本性彌陀為躰念佛信願為宗自行化他為用乃佛祖之格言後人之龜鑑凡曰音聲佛事點燭道場蓋是方便法門以之引權歸實耳此來學者迷失宗旨貪着事相不遵教典向外妄為心眼不明競稱師長實法門中一弊事也或搜鬼竅有若師巫或稱彌勒下生或言諸天附躰或向燭光上見神見鬼或在香烟上斷吉斷凶瞞昧三光欺賢罔聖誑譎問閻邀求利養及乎問他平實行願杜口無言

本性彌陀罔知下落熱亂一生盡是虛誑誤人自誤實可悲哉故楞嚴經云善男子心愛懸應爾時天魔俟得其便飛精附人口說經法訐露人事不避譏嫌口中好說未然禍福及至其時毫髮無失是人愚迷惑為菩薩親近供養破佛律儀潛行貪欲此名歷劫精魅大力鬼神年老成魔惱亂是不覺魔着謂言證聖厭足心生去彼人體師及弟子俱陷王難汝當先覺不入輪迴迷惑不知墮無間獄嗟乎初心善人不知真偽信彼邪說不務存心積德妄想求福見之謬焉吾聞積善之家必有多餘慶積不善之家必有多餘

殃故知吉凶禍福繫乎人心烏可諂求富貴而苟免禍害哉永明壽禪師云惡從心起如鍊孕垢而自毀鍊形善逐情生如珠現光而還照珠體故吾勸諸善人舉心用事必擇道而行之擇禮而從之擇友而交之擇里而處之擇師而事之兢兢焉而存心戰戰焉而守節念念不昧無失於順天之道以奉西方之教而其觀燭談禍福不與焉

辯明空見

空者破諸有也大覺世尊開示正法欲令一切人識知世間萬法皆空自悟本性之真空也真空者是如

來之法界衆生之本心空而不空有而非有悟之者於不有中運出自家寶藏探之無窮用之無盡謂之一乘妙道非頑空之空也今有一等愚人一向說空撥無因果步步行有口口言無便道飲酒食肉不礙菩提行盜行淫無妨般若縱橫放曠馳逞顛狂謗佛謗經輕毀一切胡揮亂統以當宗乘欺侮聖賢自稱得道如此者滔滔皆是也永嘉所謂豁達空撥因果莽莽蕩蕩招殃禍非斯類而何耶又楞嚴經云心若着空則有大力空魔入其心腑其人不知是其魔着口說經法潛行貪欲輕毀經像惑亂是人盡遭邪墜

魔心生厭去彼人體師及弟子俱陷王難命終自為  
魔家眷屬受魔業盡墮無間獄嗟乎去聖遠微言絕  
異端起大義乖不着於有則蕩於空着於有則執名  
相滯有為固物我泥怨親縛於近教喪於遠理蕩於  
空者則迷因果混善惡棄戒律背禮義蓋不知中道  
之為至善也或曰何謂中道曰有亦不着無亦不空  
空不離有有不離空怨親等焉物我齊焉因果明焉  
善惡分焉戒律用焉禮義脩焉近教通焉遠理至焉  
大矣哉中道也妙萬物之名乎稱本性之謂乎苟達  
斯理則不墮於偏是謂得正受念佛三昧者矣

辯一合相

金剛經云如來說一合相者即非一合相是名一合  
相良由世人一性昏迷與塵境相合即非一合相智  
者明見自己真心背塵合覺一念覺心與十方諸佛  
真空法界相合即是一合相理也永嘉云我性同共  
如來合但凡夫不悟此理貪着事相妄自執堅精心  
意識與山河大地墻壁瓦礫相合昧却理性之真空  
即非也六祖云心有所得即非一合相心無所得即  
是一合相是也今有愚人不識佛法坐吾教中妄說  
夫婦是一合相者誤矣蓋其情生智隔想變體殊業

累殃深背因昧果曲解聖典毀辱教門淨業正宗豈容是說真實脩行之士切宜堅秉正信專念彌陀於一念中不取於相內心外境了了一如自然冥符真理是也故佛果勤禪師示衆云汝等諸人但向十二時中上不見有諸佛下不見有衆生外不見有山河大地內不見有見聞覺知好惡長短打成一片一一拈出更無異見此則一合相理歷然明矣可謂日可冷月可熱衆魔不能壞真說實履道之通衢乃悟宗之正訣

辯明雙修

雙修者修福修慧也教云修福不修慧象身掛纓絡修慧不修福羅漢應供薄福慧二莊嚴乃能成正覺古德云福不得不作慧不得不學龍舒云修淨土者雖專以念佛為行門亦須福慧兼脩庶得事理兩融也內則脩慧究竟涵養深徹淵源使慧性增廣含虛空界無所不知無不照了外則脩福慈悲方便柔和善順利濟世間見一切人平等恭敬隨機說法教化衆生行一切善此是福慧雙脩也今有一等愚人常行異教詐稱蓮宗弟子妄指雙修潛通淫穢造地獄業迷誤善人沈迷欲樂甘墮險坑豈不謬乎是真狐



宗卷十  
十一  
魅妖精何異畜生類也楞嚴云若諸衆生其心不婬則不隨其生死汝修三昧本出塵勞婬心不除塵不可出縱有多智必落魔道上品魔王中品魔民下品魔女諸脩行人先斷婬心是名如來先佛世尊第一決定清淨明誨若不斷婬脩菩提者如蒸砂石欲其成飯經百千劫終不名飯汝以婬身求佛妙果縱得妙悟皆是淫根根本成婬輪轉三塗終不能出如來涅槃何路修證必使婬機身心俱斷斷性亦無於佛菩提斯可希冀如我說者名為佛說不如此說即波旬說今勸在家菩薩依戒修行勿犯邪非清心寡欲

雙修福慧回向西方龍舒云修福又修慧深信念阿彌當生上品決定更無疑其或不然欲飯蒸砂徒費力擔柴入火定殃身

### 辯明三車

法華經譬喻品云若有衆生從佛世尊聞法信受慇懃精進求一切智佛智自然智無師智如彼諸子為求牛車出於火宅故知衆生喻諸子三界喻火宅三乘喻三車如來見衆生在三界中不得出離說三乘法引令離苦譬如諸子在火宅中嬉戲長者以三車引之令出也有等愚人假說文殊問佛妄稱性是牛

車心是羊車意是鹿車又云牛車載妙法羊車載蓮  
花鹿車載經所謂醍醐上味為世所珍遇斯人等翻  
成毒藥夫法華經者諸法之王佛所護念其可妄議  
哉何期邪師認見以非為是以是為非法說非法非  
法說法誑於人謗於佛毀於法豈非負五逆之大罪  
乎經云若有誹謗是經典者當知是人入阿鼻獄具  
足一切劫盡更生如是展轉至無數劫從地獄出當  
墮畜生謗斯經故獲罪如是細思此等哀哉切心敢  
以忠言痛告道友於自己心中開示悟入佛之知見  
則此心清淨如蓮花開是謂之法華三昧悟斯理者

是乘白牛車出三界火宅也又不見法達禪師見六  
祖大師呈偈云誦經三千部曹溪一句亡未明出世  
昔寧歇累生狂羊鹿牛權設初中後善揚誰知火宅  
內元是法中王於是曹溪六祖大師乃說偈以證之  
云心迷法華轉心悟轉法華誦久不明已與義作讎  
家無念念即正有念念成邪若能如是解長駕白牛  
車是也若有執迷不省自取沉淪者吾末如之何也  
已矣

辯明三關

三關者兜率悅禪師示衆語一云撥草參玄只圖見

性只今上人性在甚處二云識得本性要脫生死生  
死到來作麼生脫三云脫得生死要知去處四大分  
離向甚處去是故透此關者則奚拘生死徹此道者則  
豈礙去來自是天下叢林宿師大衲靡不洞究淵源  
故能脫白露淨其旨曉然決無異說今有愚人妄指  
人身三丹田作內三關教人般運氣血謂之透過三  
關又說自足至腰三處疼痛為外三關妄以此處要  
定臨終時節世多傳習盡入邪路詳觀念佛之教乃  
簡徑法門祇令脩行人於十二時中持一句阿彌陀  
佛思專想寐更能回光自看阿那箇是我本性彌陀

四大分離向甚處去常有此疑驀然識得便知落處  
卽此是直捷省力底修行正道捨此之外稍涉一毫  
異說卽墮在邪見林矣嗚呼痴人背真向偽良可憫  
焉若也於斯信得截斷露布葛藤豁開透地通天眼  
覷破邪思妄想心

辨明大小二乘

原夫大法王之垂化也統攝羣品各有司存小律比  
禮刑之權大乘類鈞衡之任營福如司於漕輓製拱  
若掌於王言在國家之百吏咸脩類吾教之群宗競  
演果明此旨豈執異端應須量已才能隨力演布達

則兼濟為善窮則專門是宜雖各播於宗敵而皆處  
於慈濟同歸和合之海共坐解脫之牀夫如是則迷  
途之司南教門之木鐸也奈何源遠流別大道澆漓  
好朱者憎其素愛甘者惡其辛未契圓宗各權所據  
又豈知生佛本一凡聖性均而不能自復者由迷昧於  
身心致籠檻於生死是知身之過惡非戒律不能檢  
心之昏散非定慧不能融檢之融之尚慮乎道之不  
明性之不復况埋沒於邪歧而互相是非也耶或云  
我學小乘却又不識戒施禮誦是漸修之法或言我  
學上乘却又不識本性彌陀唯心淨土之旨不着於

事相又墮於頑空大似深村草裏生育之人坐在一  
隅不知東西南北妄生分別是是非非非非是是所  
謂執着死蛇頭錯路脩行者在穢惡則無所間然於行  
解則不見可畏以至積習成性自滅其身始學慕於  
上賢終見沉於下惡如斯之輩誠可哀哉永明壽禪  
師云譬如庭雀焉攀鴻鵠之心還似井蛙豈測滄溟  
之濶或徇他求如鑽冰而覓火但歸已解猶向乳而  
生酥慎勿立我慢幢張邪見網輕侮先覺熒惑後人  
至哉斯言也昭昭乎天日在上蕩蕩乎佛祖有靈奉  
教之者可不懼乎但能信念彌陀可以免斯過咎矣

辯明不生不滅

般若心經云是諸法空相不生不滅不垢不淨不增不減是故空中無色無受想行識等又維摩經云不善不生善法不滅故知色相有去有來佛性不生不滅今有愚人妄以不產後嗣為不生不斷欲心為不滅駭世恠言惑人妖崇密互邪媯作不淨行斷佛種性悖亂人倫故楞嚴云善男子愛極發狂熾然貪欲則有欲魔入其心腑一向說欲為菩提道化諸白衣平等行欲疑誤衆生入無間獄蓋以愚迷不知觸淨不覺遭魔以致斯苦諦觀天地肇分有陰陽而有男

女有男女而有夫婦有夫婦則有父子有父子則有君臣有君臣則有三綱五常之道三綱統其人倫五常正其教化此聖人立世間之法也吾祖遠公有云在家者厚身存生我倒未忘以情欲為苑囿以聲色為遊觀耽湎世樂不能特出吾佛示化令反本以求宗在家奉法則是順化之民不遺奉親敬君之禮是故先導之五戒不殺存乎仁不盜存乎義不媯存乎禮不妄存乎信不酒存乎智身心既律然後示之以出世之法令脩念佛三昧以為西方之歸達乎不生不滅之道是以王臣外護法流天下千載猶一日也

其奈當斯之際薰蕕共囿菽麥同畦未易分也敢以  
衷赤之忱普告信士但除却一心不亂繫念彌陀之  
外凡所有相皆是邪解切須子細真實脩行善則從  
之惡則遠之邪則遣之正則守之若乃立身行道之  
事息心達本之旨前篇備述明則典刑不為不多矣  
遵而行之則吾門眷屬違而作者則魔之黨類所以  
生遭王法死墮阿鼻殃及累世莫言不道何故嚮欲  
得不招無間業莫謗如來正法輪

辯明曹溪路

昔永嘉大師往曹溪禮拜六祖印證心地述證道歌

云自從認得曹溪路了知生死不相干是故天下禪  
宗出乎曹溪之源目曰曹溪路也何期愚人妄指人  
身有浹濬雙關作曹溪一派又妄說六祖云寧度白  
衣千千萬不度空門半箇僧如斯之輩非特惑於後  
人是亦誣於先聖豈不聞永嘉云第一迦葉首傳燈  
二十八代西天記法東流入此土菩提達磨為初祖  
六代傳衣天下聞後人得道無窮數又豈有度白衣  
而不度空門乎於戲邪妄之徒不知來歷竊祖師之  
名同魍魎妖孽見解迷誤善人正是一盲引衆盲相  
牽入火坑也吾知祖宗實德是以稱而傳之吾知闡

宗卷十  
提薄福謗辱吾宗是以恐而懼之吾尚知而大懼汝  
謗聖師之道誑後學之人安得不益懼於吾乎汝速  
宜磨滅改而正之無貽我羞之為愈也

辯佛法隱蔽

佛法者出世間之道無為之法也涅槃經云如來開  
發顯露清淨無翳迷者不解謂是秘藏智者了達即  
不名藏有等愚人妄說官法堂堂佛法隱蔽偽撰一  
落索邪言閉門傳度謂之生死奧典幻惑後人至死  
不與人說逗到臨時一場漏逗大似貧兒得錫喚作  
黃金明眼人前如何拈出自不知非反誇能會正是

信女庚申生李氏

瞞人更自瞞也豈知佛說一切法為度一切心蓋以  
衆生心躰本來是一用處不同故說一切法也祖師  
云瓶盤釵釧本是一金名相不同至體無二嗟乎末  
運法出奸生徃徃失其本體者多是将新羅漆高麗  
鍮間貨錯出巧言令色瞞昧世人一偽既行百真莫  
辨况愛小利者上人鋪席不揀好惡苟圖價廉好看  
易得等閑被他將一團灰炭塞却眼孔拖向黑地裏  
脫換去了及至眼開握着黃土也認不得又何金鍮  
真偽之辨哉癡人但得入手貴乎密密珍藏以為奇  
貨生怕人知驀然撞着識者為伊點破始知分文不

直如斯之類此皆是只為愚暗福薄眼裏無筋力  
心鹵莽兼以不遇真正師匠以致然也殊不知繞指  
精金從本來有自非作家陶鎔痛下鉗鎚煅煉一回  
轉見性柔金瑩燦然一塊覲躰全真然後隨意作用  
造成眾器飛光散彩耀人心目永無變色者固知自  
餘皆不足言矣可不至寶哉正信道流切宜著眼

辯明超日月光

大彌陀經云阿彌陀佛光明極大而為諸佛光明之  
王故號無量光佛無邊光佛無礙光佛無對光佛光  
炎王光佛清淨光佛歡喜光佛智慧光佛不斷光佛

難思光佛無稱光佛超日月光佛其光明所以照無  
央數天下幽冥之處皆常大明諸天人人民禽獸蚰飛  
蠕動見此光明莫不喜悅而生慈心悉得解脫是故  
十方諸佛菩薩緣覺聲聞悉皆稱讚因名曰超日月  
光佛蓋以日能照晝月能夜明其德不全佛之光明  
晝夜長照無虧無欠故名超日月光也今有一等愚  
人妄指教人於日月初出之時以口吸採其光吞嚥  
入腹欲其成寶以當修行秘法謂之超日月光者其  
錯大矣譬如癩猿聯臂攀樹懸崖下捉水月勞心費  
力到底成空若是智人達觀速須捨離早求正法免



宗卷十  
墮迷津專念彌陀究明心地不見祖師道從門入者  
不是家珍自己靈光照天爍地人人分上本自圓成  
一點靈源無內無外頭頭上顯物物上明若能悟此  
即如來一段光明超日月

辯明髻中珠

髻中珠者法華經云如轉輪王得法國土王於三界  
而諸小王不肯順伏時轉輪王起種種兵而往討伐  
戰有功者賞賜諸物獨王頂上有此一珠而不與之  
末後付與如來亦復如是見賢聖軍與五陰魔煩惱  
魔死魔共戰滅三毒出三界破魔網爾時如來亦大

歡喜為說諸法而不為說是法華經今乃說之如轉  
輪王久護明珠末後賜與此蓋世尊最後說是大乘  
法寶超出諸聖之上以輪王髻珠為喻此珠者即諸  
佛之圓智乃衆生之理性悟之則三祇頓越迷之則  
六道沈淪今有一等愚人錯會經旨妄以運氣入頂  
作髻中珠謂之最上乘法密密相傳教人般精運氣  
衝入頭頂要學世尊頂上有肉髻珠何其愚哉殊不知  
世尊肉髻乃無見頂相表一乘大法也無見者自  
不能見離自見故向上極則諸聖皆不得見離他見  
故壽禪師心賦云高高法座非聲聞短短之能升赫

宗卷十  
三四  
赫日輪豈外道嬰兒之所見無偏無黨至極至尊嗟  
乎愚癡之人罔知正法顛倒錯亂嫁禍移殃於後人  
賺他向善俗子墮落深坑可痛惜哉奉勸信士細參  
本教恪心念佛悔悟前非了知諸法本無髻珠自然  
顯現堂堂獨露豈假他求哉

辯明無漏果

法華經云諸漏已盡無復煩惱此乃羅漢聲聞修行  
至習漏俱無也無漏者蓋人之六根常為色聲香味  
觸法六塵所惑心隨境轉成有漏緣所以輪迴不息  
修行人六根自靜不被六塵所轉即無漏也今有一

等愚人妄將眼眵鼻涕盡皆喫了謂之修無漏者何  
蠢乎哉予嘗憫而問之曰六根四大膿血之袋屎尿  
之囊眵淚涕唾皆屬不淨何得取而食之彼則曰人  
身之中有七寶不可棄之善收拾者結成舍利證無  
漏也苦哉苦哉如斯顛倒誠可忍耶更有一等眾生  
以秘精是無漏者混吾教中遞相傳習潛饕貪欲壞  
亂正法此是妖精鬼恠夜聚曉散喫菜事魔之徒非  
是蓮宗之弟子比年以來多有此樣扇動人家清信  
男女不覺不知鼓入魔道故楞嚴經云善男子心愛  
根本窮覽物化天魔得便飛精附人說佛涅槃即是

現前肉身父子子通代相生常住不絕無別淨居  
愚人信受亡失本心惑為菩薩常說眼耳鼻舌皆為  
淨土男女二根即是菩提或食屎尿廣行媼穢彼無  
知者信是穢言易入邪悟此名蠱毒惡鬼惱亂是人  
師及弟子俱陷王難汝當先覺不入輪迴迷惑不知  
墮無間獄受得地獄業消復入畜生餓鬼今觀邪師  
妄作之徒假吾佛祖之教門造不淨之惡業逆二儀  
背三光謗佛祖亂人倫碌碌如蜚蛆之逐穢現受眾  
苦沒後沉淪是罪果何逃哉宜乎不足恠也非惟死  
後受報抑且官法不容語云道之以政齊之以刑民

免而無耻道之以德齊之以禮有耻且格誠哉是言  
今勸善流諦觀聖訓宜自知耻勿憚改過捐情絕慮  
正己脩行有能古教照心則其心自明古鏡照精則  
其精自形若專於淨行趣於菩提決無誤矣其或不  
然三塗業海無邊際千佛出來難救伊

辯明趙州茶

昔趙州和尚見僧問曰汝曾到此不僧云曾到州云  
喫茶云又問僧云曾到此不僧云不曾到州云喫茶  
去院主問曾到且從不曾到如何也喫茶去州乃喚  
院主主應諾州云喫茶去叢林曰此有趙州茶話公

案今愚人不明祖師大意妄自造作將口內津唾灌漱三十六次嚥之謂之喫趙州茶或有臨終妄指教人用硃砂末茶點一盞喫了便能死去是會趙州機關更可憐憫者有等魔子以小便作趙州茶何愚惑哉非妖恠而何耶真正脩心者但依本分念佛期生淨邦切不可妄將祖師公案杜撰穿鑿是謗大般若之罪人也不見道亦可粉身千萬劫莫將佛法亂傳揚

辯明教外別傳

圓悟勤禪師云西方大聖人出迦維羅國作無邊量

妙用啓迪群靈其方便順逆開遮餘言遺典盈溢寶藏以至下梢始露一機謂之教外別傳迦葉破顏承當以來的的綿綿直指人心見性成佛不立階梯不生知見利根上智向無明窟子裏瞥地煩惱根株中活脫應時超證得大解脫西天四七東土二三皆龍象蹴踏師勝資強格外領畧當下業障冰消直截承荷自能管帶打作一片頓契佛地尚不肯向死水裏浸却唱出透玄妙句超越佛祖剗斷露布葛藤如按大阿凜凜神威阿誰敢近作家漢確實論量纔有向上向下談玄說妙作用纖毫即便叱之謂不是種草

直下十成煅煉得熟履踐得實始畧放過猶恐他時  
異日落草累人瞎却正眼嗟見一等拍盲野狐種族  
自不曾夢見祖師妄言達磨歸空謂之傳法救迷情  
以至借他從上最大宗師馬祖趙州名目脫賺後人  
及誇初祖隻履西歸普化空棺皆謂此術有驗謂之  
形神俱妙生死秘法遞相傳習而人皆厚愛此者生  
怕臆月三十日悵惶競學歸程之法除夜拜影喚主  
人公真是誑譎間閻担偽造窠貽高人嗤鄙復有一  
種假托達磨胎息趙州十二時別歌龐居士轉河車  
頌遞互指受密付傳持希望生天更要預知死日殊

不知此真妄想邪心愛見本是善因反招惡果多見  
豪傑之士高談濶論者不知宗因徃徃信之那知失  
却故步畫虎成狸遭明眼人覷破默觀憐憫豈諸佛  
與列祖體裁止如是耶曾不自回照始末居然可知  
矣海內學此者如麻似粟習以成風恬不知恠其高  
識遠見自不因循恐乍發意未入閻奧立志雖專跋  
涉雖遠遇增上慢導入邪見稠林末上一錯永沒回  
轉其流浸廣莫之能遏因出此語以痛告之庶有志  
願於大解脫大總持者可以辨之而同入大薩婆若  
海汎慈舟接濟羣品俾正真妙道流於無窮豈不快

哉

辯關閉諸惡趣門開示涅槃正路

諸惡趣門者乃身口意三業也所謂身殺盜婬口妄言綺語惡口兩舌意貪瞋癡修淨業人正心向道截斷已上十不善行則不入惡道謂之關閉諸惡趣門也開示者指出也涅槃者不生不滅也正者不偏路即西方之道也今有愚人指口為諸惡門鼻為涅槃路教人臨終時緊閉其口令氣從鼻出謂之出門一步又妄將因字以為公案教人口裏着力忍了氣透這一關或云因字四圍是酒色財氣或言地水火風

或言生老病死等皆是卜度妄計曲說嗟乎這一箇因字瞞盡多少人殊不知此字玉篇明載尸卧切即阿字去聲呼也此箇因字一劫世人口中未嘗不說喻如失物人忽然尋見不覺發此一聲是因字也宗門多言此字者蓋尋師訪道之人叅究三二十年忽然心花發現會得此事不覺因地一聲如失物得見慶快平生是其字義也如是則念佛之人但於念念中仔細究竟本性彌陀忽然親悟親見真實到因地一聲處自然明徹矣故智覺壽禪師云心外求法望石女而生兒意上起思邀空花而結果本非有作性

自無為智者莫能運其意像者何以狀其儀言語道  
亡是得路指歸之日心行處滅當放身捨命之時可  
謂唯此一事實餘二即非真

辯明四生

大珠慧海禪師云九類衆生一心具足隨造隨成無  
明暗蔽為卵生煩惱包裹為胎生愛水浸潤為濕生  
歛起妄念為化生悟即成佛迷號衆生菩薩只以念  
念心為衆生若了心躰空寂名為度衆生也智者於  
自本際上度於未形未形既空即知實無衆生得滅  
度者有等愚人不識自心胡卜亂度妄說臨終之時

信女大心華尹氏伏為父母

眼見轎馬樓臺幡蓋銑鉞之類為四生六道胎窠不  
隨他去者脫四生也殊不知臨終現境是備平時所  
作善惡業相神識自現即非外來故先德云作惡而  
惡境現前念佛而佛界自至若是時中把捉不住做  
不得主常被妄想顛倒所使臨當風火散壞之時如  
落蕩螃蟹相似又焉能作主宰耶是以圭峯禪師云  
作有義事是惺悟心作無義事是狂亂心狂亂隨情  
念臨終被業牽惺悟不由情臨終能轉業今以此語  
直告諸人當自念言我今修行淨業本為生死佛祖  
垂教豈欺我哉當依正法直實存心專念彌陀捨諸

虛妄朝思夕想念念願生西方如此則塵勞業識當下尾解冰消反觀自己生死尚不可得又喚甚麼作衆生乎故懺云於一念中得念佛三昧普度十方六道一切衆生各各出離苦輪同生淨土者是也可謂妄心無處即菩提生死涅槃本平等

破妄立十號

西方文云念佛之人於相好光明之中得見阿彌陀佛則無明頓破煩惱永忘法界之門忽然通達一乘之路卓爾開門十號俱彰也十號者菩薩戒經云一曰如來證佛果十號俱彰也十號者菩薩戒經云一曰如來

無虛妄故二曰應供良福田故三曰正徧知知法界故四曰明行足

天眼智明宿命智明漏盡智明具三用故五曰善逝還來故六曰世間解無上

七曰調御丈夫能調伏衆生惡故

八曰天人師為衆生作眼目故九曰佛知善不善法聚非善非惡故十

曰世尊無二佛之中何期愚人不知佛法妄立十號歸

程稱為達磨大師傳來生死秘法却云鵲巢灌頂蒼

芽穿膝玉柱麓混蛇入視禡波斯獻寶天鼓不鳴蓮

花池乾二祖斷臂立雪齊腰神光不現以此十件謂

之大事因緣往往蓮宗彼此等盲師瞎漢適相傳授

賺人性命從冥入冥陷於非道何不思之甚也達磨



宗卷十  
大師初至此土不立文字直指人心見性成佛又安  
得有一法傳授乎豈不聞五祖弘忍大師為六祖曰  
佛即以心傳心法即以心印心佛佛惟傳本師師  
密付本心是也莊子云使道之可傳人莫不傳之子  
孫道之可獻人莫不獻之君親其不可傳獻者無他  
中無主而外無其證也又嘗聞我佛釋迦世尊千生  
煉行百劫脩心迺從兜率降跡王宮棄萬乘榮貴向  
雪山修行冷麻食麥苦行六年覩見明星悟道成佛  
人中聖中稱為大覺十號具足作天人師至於鵲巢  
頂上蘆芽穿膝之類皆當年實事初無表法止是端

信女蓮峯奉母無際華

坐不動定久忘形之意後之學者不近智達不體我  
佛建立教門大不容易纔得入他門戶行願不習識  
見俱無便要為師傅度弟子做大模樣逞我能會撞入  
邪魔黨類中學他許多邪法雜毒入心如落水鬼相  
似黑地裏拖人入地獄去苦哉苦哉且如二祖斷臂  
立雪齊腰的是當時為法忘軀猛烈之志本傳備載  
分明學者自當詳究豈可妄為甘受謫法之罪永沉  
苦海之珠永嘉云非不非是不是差之毫釐失千里  
是則龍女頓成佛非則善星生陷墜信麼盡情掃蕩  
閑家具鐵樹花開別有春

誓願流通

劫惟最初一念元從淨土中來汨沒多生未脫娑婆  
世界幸逢蓮社得遇正宗仰藉三寶餘麻感沐導師  
化育伏為教門之下多有錯路脩行嗟信心盡作  
魔民致良善俱遭邪墜正因泯絕慧命難存反招謗  
法深憊豈有誦持功德覩斯境界以長吁痛切身心  
而不忍是乃搜大藏之要旨用證本宗掃百家之是  
非開明大道並是依經辨理顯正摧邪照了無私故  
名寶鑑俾夫後學照心目而妍醜自知導彼迷途達  
家鄉而免諸流浪是集克就鄙志當陳百拜祖庭重

申大誓告白十方諸佛諸大祖師望賜慈光證明祈  
禱普度敬自發心立願照依所集蓮宗寶鑑篇字數  
一字三禮每一禮念楞嚴呪心一遍三稱南無觀世  
音菩薩尊號望悲心而憐憫賜法力以冥加俾魔外  
以皈依冀真乘之流布與彼盲瞑開眼目於諸病苦  
作良醫昏衢黑暗之中為燈為燭苦海洪波之內為  
舟為航危險處作大橋梁迷路中示其正道普為十  
方蓮社諸上善人同期懺滌於身心各願掃除於業  
障非法說法之咎法說非法之憊一智能滅萬年愚  
一燈能破千年暗妄意消而空花滅正信生而淨行

彰信禮彌陀普同回向與諸大眾並從今日發菩提  
盡於未來永劫常行菩薩道離非梵行遠邪見師願  
盡此報身同生安養國常修六念及六波羅廣運四  
心與四弘誓發四十八願如阿彌陀得念佛三昧如  
大勢至脩普賢之行願等觀音之慈悲學大智慧如  
文殊次登補處如彌勒頓入法界圓證上乘分身徧  
至於十方大悲普度於一切建法幢立宗旨耀慧日  
除癡冥諸魔外道悉歸降匝地普天皆嚮化辯才無  
礙廣利塵沙威德無邊拯濟含識父母師長俱登解  
脫之門累劫怨親盡出沉淪之海伏望觀是集者起

信女快玄華兩位

護法心蕩歷劫之迷情破千重之疑網頓豁正眼明  
悟本心淨土道場不動足到西方大聖如對目前萬  
法了然竝在茲也惟冀天龍歡喜聞正法以護持凡  
聖皈依掃邪風而絕迹弘揚祖道廣播宗風融大千  
同為清泰之邦俾四海共樂無為之化正見邪見盡  
入無生

皇恩

佛恩一時等報虛空界盡衆生界盡衆生業盡衆生  
煩惱盡我願乃盡而虛空界乃至衆生業煩惱不可  
盡故我此願王無有窮盡念念相續無有間斷身語

意業無有疲厭普賢菩薩發願如是諸大祖師發願亦如是我今發願亦如是普為蓮社大眾發願亦如是盡未來際一切情與無情發願亦如是如是如是無不如是願同如是恒沙衆盡入如來願海中

廬山蓮宗寶鑑念佛正論卷第十終

名德題跋十一章

余嘗觀夫今之所謂崇蓮宗者多不本遠祖之意非惟失其進修之序亦且惑於邪師認解深恨未有能採其弊者優曇大師乃採經論傳記至於古今名儒宿衲集諸善言刪潤着述而成一書凡十卷曰蓮宗寶鑑立正論以破邪說發真智以祛妄情其言理也深而明其叙事也詳而盡會三教而歸一源正一己以規衆信如鏡照像洞然明白豈特俾諸善流專念彌陀祈生淨土直欲人人明自本心見自本性立地成佛而已以余嘗主東林欲永轉語為證返復數過

真得我心之所同然者乃合掌西嚮而歸之曰善哉  
善哉如是如是歲乙巳大德八年八月十五日明州  
天童圓應叟淨日題

寶鑑者照心之鏡也鏡主乎明則燦一切昏迷辨一  
切妍醜懸之當臺靡所不見東林祖堂優曇大師名  
普度具正知見每念蓮宗認解垂真折衷儒釋之書  
撰為寶鑑十卷發明念佛正宗三昧凡一字字一句  
句質之佛祖龍天並是掃空魔說實為法門一大條  
貫其用意誠且公勤且苦扶宗勇敢之心與十八賢  
立教之心共箇關紐聞者見者咸趨通途或順或違

坤俞甲寅生金氏伏為父母

同一清泰復為偈云千載蓮宗宏正論明逾寶鑑挂  
青霄今將印板打成去萬兩黃金也合消 蓮宗書  
叅禪主乎見性閱教貴乎照心予謂念佛一門禪教  
並行者也今有優曇度法師纂集古今念佛要旨總  
成一部目曰蓮宗寶鑑若其自信得及淨念相繼奚  
以文為若其執妄認解妍醜不分白日迷程投吳適  
越者是當取此為司南大德乙巳良月望日娶西峰  
宗信跋

彌陀自性時時現淨土唯心法法彰誰憶遠公千載  
後蓮宗寶鑑見重光 大慶壽西雲題

東林蓮社度宗師述

蓮宗寶鑑復以偈遠寄囑語再讀起敬說偈就簡以謝 大地衆生病痛深向膏盲際巧施鍼白蓮池上優曇現萬斛香浮廬阜陰 薦福月內

叅禪予所不去念佛亦非予所去者聞禪有禪病佛有佛魔去聖時遙比比皆是優曇師眼不忍見廣援正經盡祛邪說是集不爲無補矣噫安得盡大地人掀翻寶鑑洞見法源能所識銷是非情盡以唯心淨土本地風光並相忘於言象之表此予所以不能無說焉 平江幻住本敬跋

法不孤起伏境方生劔離匣為不平藥出瓶因救病優曇大師傷蓮宗之凋瘵搜索大藏討究百家發明念佛三昧据撫成書目之曰寶鑑事分十門理符一致排擲邪說訂審舛訛咸有準憑非私臆論洗頑囂於意地破徧執於心源坐進覺城光敷祖道使正教大明於一統釋疑情桎梏於畛畦導黎庶於重昏報皇恩於萬世贊莫及矣貽諸後云 荆岑接待主智通拜書

結蓮社以開宗遠祖垂範於千載之上集法寶以爲鑑優曇示現於像季之時以蓮爲名顯一心之本淨

其為宗也攝三根圓證真常以寶為喻濟萬有以無窮其為鑑也爍羣昏洞超幽劫卓然為一家正論廓然破諸宗異說披文三復實非小補嘗觀匡山集中禪經序有所謂千載之下優曇再證可不坼乎祖師遠記果符於今日信而有徵矣 天峰比丘致祐拜手書

禮云其人存則其政舉旨哉斯言三宗聖人垂世立教覺斯民之未覺途殊而歸同中古以降支分派列愈出而愈歧失其本旨者可勝道哉蓮教自東晉廬山尊者啓其端當時名流如劉雷諸賢皆在社中其

盛集既可想見矣逮至宋末群不逞輩指蓮宗而聚眾不知本旨有玷前賢為世所嗤久矣東林祖堂優曇大師憫斯教之湮微拯流俗之邪舛褒集善言纂成二編目曰蓮宗寶鑑使佛祖之道復還舊貫確然正論皎如日星願諸佛子見自性彌陀悟本來清淨又何獨稱揚聖號想念西方然後得生淨土耶作如是見者辜負廬山尊者不少矣至大改元良月立冬日翰林學士承旨資善大夫知制誥兼脩國史疇齋張仲壽書

裂蓋網出愛河破無明超有漏惟念佛法門為最苟

不越一念而契證則塵沙剎海廓然歸乎智照無東  
西之間淨穢之殊四生九有感入神通大光明蔽自  
遠祖立教見聞薰脩獲益者不可周知而悉數也嗟  
乎去古時遙法久成弊優曇老師終見不平集大藏  
要文群賢明迹曰蓮宗寶鑑親捧

綸音流通于世真萬古不易之論俾後之學者鑒斯  
文具正見同遊常寂光土豈小補哉歲甲寅正月旦  
日 廬山無住道人竺源永盛拜手

父母非我親誰是寂親者諸佛非我道誰是最道者  
古洪水月居士何道昇為母持齋施財率眾同緣刊

蓮宗寶鑑一部流通佛法報答四恩願一切人得念  
佛三昧如大勢至母子歷生不相違遠心開意解同  
證菩提可謂孝慈之心至矣博矣親恩佛恩一時報  
畢余嘉其志合掌讚嘆為說偈云

流通佛法報慈恩 母子天真一會人 為報諸  
方求佛者 看他樣子重生身 廬山優曇普度  
謹題

吾佛生於西方大教流於中國不言而自信不令  
而自行者以其機感相投自然而然而也至於東晉  
廬山遠師與諸高蹈賢士大夫同結淨土妙緣專



脩念佛三昧惺惺寂寂惺惺發揚先覺之微言  
永為後人之明鑑上以陰翊

皇度下以化利生民可謂盡善盡美而已垂之千年  
復有繼踵苾芻優曇應世每見稱蓮宗者未諳念  
佛旨趣認解錯路脩行目覩耳聞化化皆是擬避  
水溺却遭火焚憫斯愚輩痛切哀憐由是披尋大  
藏博采微言圖寫四土綴文十篇目曰寶鑑不唯  
照分妍醜抑亦明驗偽真與盲者點開眼睛與迷  
者指皈覺路言言有據字字無虛脩行要旨勿越  
於斯茲者奉 佛弟子衆善人等生居

聖世感荷

皇恩幸聞佛祖正傳得獲蓮宗寶鑑坐閱行披歡喜  
踊躍是以鳩集同志謹捨淨財命工刊印流通請  
師慈悲跋語提携晚進接引後來苟勿拒焉實為  
幸矣余再三辭義不終讓遂乃焚香說偈讚曰

東晉廬山十八賢 鑿池引水種金蓮

蓮生花發心明朗 花落蓮成道果圓

普度綴文名寶鑑 善人謄寫錄瓊篇

命工刊印流通施 永與人天作正傳

大明宣德四年歲次己酉夏末秋初禪林解制日

僧錄司右講經古并 沙門 敬跋

無更緣世斷山青

佛祖到門前 路隔

明君一炷烟 啣花

祝但往來絕烏白

主上殿下辛卯生李氏聖壽萬歲

王妃殿下丁酉生金氏聖壽萬歲

太上王大妃巳酉生金氏聖壽萬歲

大王大妃戊辰生趙氏聖壽萬歲

王大妃辛卯生洪氏 聖壽萬歲



